

四庫全書

集部

欽定四庫全書

宮教集卷六

宋 崔敦禮 撰

記六首

平江府教授廳壁記

鄉里必有學學必有師儒古之制也周之黨庠術序之法行仕焉而歸老則教於其鄉大夫為士師士為少師由漢至唐州郡興學文學博士之員列於僚佐國朝慶厯間天子開天章閣與大臣論治所先務慨然詔天下

皆得立學於是設教之職有可充選者部使者郡守許以名聞熙寧以來簡置悉由於朝清其選號為外道館閣姑蘇大郡先自范文正公出守割南園之地以創學宮繼以前輩名儒相承講道文風之盛濟濟乎洋洋乎為江浙冠吁其盛哉余掌學之明年諸生合辭以請曰學舊無題名前人名氏將湮沒不傳今稽之圖籍自樂圃先生朱伯原而上所可見者五人又訪之耆老自林元孚而下繼之三十有五人雖官資歲月不能盡省而

先後之次皆可考識願刻諸石以圖永久余曰子可謂知本矣仕於郡者分職而治夜漏未盡已起纓弁束衽詣長官白事退則困吏牘埋沒不得出氣其所可否關民休戚甚則繫人之生死教官抱塵編對青衿空談其間課程無補於簿書絃歌不應於期會真若緩不急者而天下之治亂風俗之厚薄其原蓋出乎此諸儒教導余不得優劣獨攷其次安定先生翼之實首居其任先生所至務以體用之學訓學者東南之士出其門無慮

二千人其徒劉執中奏事熙寧間謂今學者明夫聖人體用以為政教之本皆由師之力今門人在朝若錢藻之淵篤孫覺之純明范純仁之直溫錢公輔之簡諒在外明體適用以教於民逮數十輩其餘政事文學出於時不可勝數當是之時天下無事內之風化醇百姓安外之威靈宣四夷服治道運行諸產得宜恩肥土渥遠近咸撫固曰上之德亦一時人材出於先生之門者與有力也余生乎後時不獲親而炙之幸與二三子搜次

名氏因書其事以示後之人庶乎為典教之丕式且亦知教事之為重云乾道壬辰冬至日記

高郵主簿廳壁記

凡人有尺寸才皆欲隨短長自見處非其所類墨墨不得意若事適當爾欲開空造有出意見作可喜事則拘礙尺度動輒出位高郵淮東壯邑也邑無丞簿實贊令事鈎考外若監事若常平向總於丞號劇煩者簿悉主辦紹興辛巳郡其邑凡郡之體畧備丞事悉分於諸曹

簿所掌唯鈎稽在余初到官適逢朝廷布曠大之澤詔
省簿事圖籍皆度閣不復用則所謂簿者迺無毫髮以
見清晨謁上官不交一言而退庭內閑閑日影布地時
有二三子抱書在門門外彌望菜畦晚色蔥翠泔泔聞
灌溉聲亦有老農圃時輯杖來談田間占候事飯餘細
履好風吹衣且不知身之有我也況為簪笏累乎廳舊
無記問之老吏得前任名氏若干人書於壁

代嚴子文滁州奠枕樓記

乾道元年疆陞罷兵烽火撤警邊民父子收耄戈甲歸
服田壟天子軫念兩淮休養涵育俾各安宇二千石能
宣主德屬之民則居者以寧流者以還否則境內蕭條
民戚戚不莫厥居八年某月滁人闕守詔用右宣教郎
辛侯幼安至之日周視郭郭蕩然成墟其民編茅籍葦
僑寄於瓦礫之場廬宿不修行者露蓋市無鷄豚晨夕
之須無得侯慨然作曰是可已也耶自兵休迄今江以
北所在寧輯鷄鳴犬吠邑屋相接而獨滁若是守土者

過也余何辭於是早夜以思求所以為安集之計郡之
酤肆舊頽廢不治市區寂然人無以為樂侯乃易而新
之曰凡邸館所以召和氣作民之歡心也非直曰程課
入云爾即館之傍築逆旅之邸宿息屏蔽罔不畢備納
車聚櫟各有所四方之至者不求皆予之以歸自是
流通四來商旅畢集人情愉愉上下綏泰樂生興事民
用富庶既又揭樓於邸之上名之曰奠枕使其民登臨
而歌舞之面城邑之清明俯閭閻之繁夥荒陋之氣一

洗而空矣樓成而落之候舉酒樓上屬父老而告曰今日之居安乎壯者擐甲胄弱者供轉輸急呼疾步勢若星火時則思太平無事之為安水旱相仍秉耒耜者一墾不得起糴甚貴衾裯不易斗粟時則思豐年樂歲之為安驚懼盜賊困逼於饑饉蕩析爾土六親不得相保時則思按堵樂業之為安今疆事清理年穀順成連甍比屋之民各復其業吾與父老登樓以娛樂東望瓦梁清流關山川增氣鬱乎葱葱前瞻豐山玩林壑之美景

醉翁之遺風豈不休哉侯喜其政之成移書二千里乞
余文以為記余曰是不可不書也故為之書侯有文武
材偉人也嘗官朝名棄疾幼安其字云

地藏經文變相圖記

敦禮世居通州自少時侍家君讀書問詩禮外無他及
常言我先祖慈祥仁厚出於天性賑貧恤孤惟恐不及
護物生命如護頭目視物之傷如其所愛故通人稱之不
以姓以字而曰放生先祖蓋嘗謂佛菩薩中誓願宏闊

莫大於地藏顯見果報使人知戒懼修省莫詳於是經
紹聖間乃以菩薩相及經文求諸變相命工繪畫指授
規模精思講究數年而有成既成刻之佳木作文以紀
其實於是菩薩救護衆生種種果報揭之圖像一目而
盡觀相生善無有蔽惑靖康以來其板不存而所施本
復不可得至今中夜以興夢寐追想常恐斯世之不獲
見敦禮聞家君斯言未嘗不為深嘆而流涕也隆興改
元之冬里人陳姓顯名者袖出是畫且欲獨出己力鏤

板而鼎新之家君展閱披玩再拜感泣曰此祖遺迹也
散施四方幾數萬本自失其板迄今幾四十年廣求博
訪竟不得不圖今日獲與諸孫羅拜瞻禮視其下之文
皆腐爛漫滅不可辨命敦禮誌之敦禮俯伏敬謝不敢
曰我先祖得古佛心法而於佛書無所不讀讀無不得
旨歸多所著述皆極至當敦禮愚無知不足窺測萬一
安敢補具亡家君曰因前人之志以成其美而久其傳
善事也其又何辭不獲已乃追述而為之言曰爾時世

尊居忉利天於大圓滿光明等雲中於檀波羅蜜微妙
等音中廣說地藏菩薩摩訶薩功德不可思議嘗立大
願欲使罪苦衆生盡成佛境我然後方成正覺惟是菩
薩威神誓願比諸菩薩最為廣大世之不知佛者乃以
方袍圓頂作菩薩像列之神祠廟廡間及於歌唄有閻
王殿臨地獄門之句遂使世人生狎劣想我先祖因得
向往所畫入菩薩本地藏菩薩實與寶衣天冠之數復
取其經文章分句析而作是相凡處世間若貴若賤若

愚若智若長若幼若大若小觀此變相悟諸報於見在世及未來世塵緣妄想永斷諸惡及事理障不以口腹屠戮物命不生貪嗔而肆欺忍并諸罪業皆悉斷滅及為一切而作方便應觀是像作如是觀

建康府溧陽縣報恩寺度僧田記

建康府溧陽縣報恩寺蕭梁天監中所作也初在縣之西北五十里元祐間改築於東門外今其址也乾道三年余始卜居是邑見于寺者惟頽簷腐棟蛇鼠穿穴如

逃人家單鉢不陳像設彫剥過者動心焉五年衆請蜀
道淵住持淵素為一方信向至是慨然以興作為已任
勤身苦志不避寒暑盡力于治寺門廊殿經像樓閣齋
庖庫庾嚴飾畧具鐘唄日聞粥魚齋鼓之聲不絕一日
淵與其徒謀曰吾支傾補壞粗成禪席今將時葺而歲
增之莊嚴殊勝作大道場則豈吾力所可獨任亦賴方
來之士心同力全臂股相用乃克有濟而寺素空靈無
以度人四方之遊者泛然惟傳舍之視苟不為之計寺

之興廢未可知也乃飭其徒慧如者循諸方例募置常產為度僧局銖積寸累得膏腴之田若干畝凡志于學利于衆勞於寺事則以歲之入度之設為科條至精且密於是人勸其功墮者思進懦者思奮歡喜踴躍而作佛事淵猶懼其無以示後之人也乞余為之記吁佛教之盛於世非特曰死生禍福之說足以儆動人也蓋為之徒者類能維持其法深計而善殖之是以至於愈久而不泯也吾儒之道根於人心被之天下若飢食渴飲

不可以一日廢學吾學者解褐而仕仕則以道德為迂
闊以詩書為陳腐無有能長慮遠圖為名教地者相薰
以此雖有賢者作豈易得志于其間哉余觀淵之用心
而有感于吾道也故為之書淳熙三年十一月二十五
日靜海崔敦禮記

海虞山寶嚴寺田記

常熟縣之北有海虞山而西有道場曰寶嚴寺寺有教
院荒陋不足安衆又無神靈降依為之驚動禍福以來

四方之供單鉢不陳像設無饗余每過之雖憐而力不至也一日主僧德章來謁曰吾院有可興之理邑人劉姓康名者自言其父嘗以報慈寶嚴及吾院俱貧不能給欲施田以辦百斛為三寺助粥飯緣生前願力勝追修百倍是不可墜乃舍之如其數而三分焉今梵宮相望粥魚齋鼓鈺鈺隱隱振響山谷間劉氏與有力也吾將自是莊嚴積累興無盡供願求一言記之以勸來者余曰近世多田家連亘阡陌至不可畝計揚珠擣玉露

積而不收及其較封洫辨疆畛爭尺寸如爭死利害劉氏除慳舍有割膏肥之地而作佛事如執左券樂然付之畧無難色是可取也矣故為之言康孝而樂善其父諱仲榮

序八首

送鄭與之赴召序

乾道改元三月句容尉鄭君與之以封事獻諸朝越日有詔徵鄭君赴闕下古之剛介鯁亮之士得位於朝立

玉陛方寸地明目張膽指朝政闕失言當乎古論事拂
乎當途抗天觸神忤雷驚霆聽之可福於民利於國否
則放棄竄斥寄一死於千萬里外與之江左一尉官至
卑且甚踈遠而一旦披腹心呈琅玕劍鋒差然累萬餘
言書紙數十幅寄牋西風朝奏而暮召雖古之士遭際
有不能及吁亦榮矣將行告辭于同寮江寧尉崔敦禮
酌而別執醴而言曰與之敢言高論旁若無人真能破
羣議駭動時聽今其行若登僊世俗榮之執政樂之富

貴爵祿夫何憂又祝之曰與之以儒術致身推所學足以成厥功無詭隨無去其本善為吾儒主盟與之喜曰非子其誰為我言言竟遂書以為序

送汪叅政赴召序

乾道改元宰相既虛席天子若曰皇天畀付予有家輔贊彌縫緊相臣是資曷可不擇擇必遴選日久言臣合辭曰是豕宰實百辟長不可以久曠跽而陳詞得請天子曰不然朕志自定固有待退毋庸辭迺越月有詔參

政汪公赴闕下公辭不可遂行江寧尉崔敦禮職徼巡
禮出送境外東帶執笏立道左修屬吏敬將進斂板而
前曰參政碩大高明全德備道行方事實為今世推仰
邇者起山林長東方諸侯天下士若民無大小無衆寡
無不願用以相今其行坐廟堂握鈞軸何疑雖然上選
付既重則委任必隆天下屬望既切則責賢必備方今
外難雖寧內治未振人材散逸收拾愛護之意未周政
令迫趣中和樂易之化未全戎備懈弛長顧遠慮之圖

未究士俗澆薄鎮浮起懦之風未暢凡天下翹首想望
未得者屬在參政參政其必有處此記曰惟天下至誠
為能經綸天下之大經立天下之大本又曰至誠無息
不息則久參政念之哉

平江同官小錄序

宦遊之途廣交際之情泛風俗之大患也古之時諸侯
裂土而封士之仕者各于其國不在西封在東境世其
職因以為姓氏官曹之所聯接朝夕之所同事非其宗

族則其父兄之執非少長之父則其里巷之親戚後世九州四海相易而仕平時風馬牛邈不相及懷章隨牒叢萃而羣處秩既滿又飄然而去君南我北了不聞在否世繫不省爵里不傳十年之後升沉反覆卑者走塵土高者上霄漢情隔勢絕相忘若不相識吁豈理哉姑蘇大府當四達之衢我冠來仕者駢倚而疊足長洲令沈君喜僚寀之多賢念交游之易散編次名氏聯成大帙俾余題其首嗚呼此足以振頽俗矣今人道途相避

迨解車卸馬相勞苦一語愜意問姓氏退而書之以示
不忘同官之好前輩敦厚風俗講之為至其誼重其契
及于子孫今乃畧不記其本末則薄矣余既嘉沈君之
意而樂名教之有助也於是乎書

韋蘇州集序

韋蘇州詩集十卷并續添七篇大丞相觀文魏公守平
江命教官所校也自大雅微闕作詩者並驅爭馳其才
思風韻固不可一槩惟自優游平易中來天理渾融若

無意於詩者此體最為高絕韋蘇州以詩鳴唐其辭清
深閒遠自成一家至歌行益高古近風雅非天趣雅澹
稟賦自然者不能作至今觀其逢楊開府詩云朝持擣
菰局莫竊東隣姬一字都不識飲酒肆頑癡武皇升僊
去憔悴被人欺讀書事已晚把筆學題詩乃少年豪縱
之人耳按蘇州在廣德中已為洛陽丞去武皇升仙才
歲餘當時作詩尤稱絕唱豈初識字把筆學為者又廣
德中洛陽作云生長太平日不知太平歡野居云結髮

累辭秩則其少年在太平時本自恬靜至作漢武帝詩
力詆神仙畋遊之事又似在天寶間譏諷時政者豈蘇
州心知天寶之時亂欲去不能嘗為是穢迹自晦之計
與不然亦自序之過也方蘇州在時其詩未甚貴重後
三十餘年白樂天始愛之東坡先生亦云樂天長短三
千首却愛韋郎五字詩坡豈薄蘇州者以樂天之文之
華麗宜於無不愛也大凡浮靡之詞易說平淡之音難
聽理固然耳今丞相觀文公貴本尚古嗜好與衆絕殊

顧於此耽玩所甚好不少置其職斯文者曷敢不敬以承詩之本不一以葛繁本正參以諸本是正凡三百處而羸又得九日一詩附於卷末若蘇州之名氏與仕與年則有姚君令威之所書在云

送沈定海序

有地百里有民與社而立之令天子之官自宰相至於郡刺史事關而慮不專不專故情有不能親勢有不能及者令得行之獎一善一境之人勸懲一惡一境之人

懼士而為令足以行志矣而今之人多避而不為嚴其
法使初改秩者必為令限以陞擢之格非嘗歷令不得
選其治理效不以次用至矣而幸免者猶以為喜非不
欲為也有所沮也有賢令焉大吏仁且明足以知之則
供繭絲菽粟奉常入外從容無事勉民以孝悌之義勵
民以忠信之行職也苟不遇焉搜抉剗摘舉逋籍按條
目而責之令視令為一逋戶繩以峻法督以健吏惟恐
不嚴且急令不得已橫征悉索敲榜以奉期約朝夕困

吏牘不得出氣論教化談忠厚則溺其職矣沈君子麟
懷定海之綬將行告於鄉閭敦禮與之別而為之辭曰
定海今劇邑其地岸海其民勁質易以德義服子麟清
純雅亮文麗而學深有君子之風其容粹然其氣溫然
足以使其民回心而向道為賢令信其無疑今有行猶
懼大吏之不遇而為令之賢者沮也於是為言

送張德昭歸通州序

余宦遊江南遂家金瀨之陽泉甘而土肥掘雲採月偃

塞江湖間足以自樂地僻左與淮風馬牛鄉里人迹所
不到首丘懷土鬱不能釋夜半有客剝啄扣門攬衣起
聽覺非吳越音啟戶而入之海門張德昭也德昭於余
有伯仲行至親且甚厚去故鄉見似人猶不可得德昭
茫然而來鰲面塞足千里而訪我喜可勝言挽鬚握手掀
衽劇譚訪親舊之在亡問里巷之盛衰不知身之去澄
江之上狼山之旁也兄其歸矣無以為兄祝為我謝鄉
里崔仲由年三十五無顯名厚實於時今且為耕田夫

苟得歸里固將有藉以見長老可教我者願寄東風

送嚴江陰守序

有地千里分土于社而為之守天子之官自宰相至于
部刺史事闊而慮不專情有不能親勢有不能及者守
得為之古之人下車見百年之老問風俗之所宜與其
民疾苦出于郊視五穀美惡然後為條教勸民為善置
師帥伍長班行之後世為吏者以功利為急入其境爾
絲豐乎金布溢乎論教化談忠厚則溺其職矣江陰新

使君嚴公家吳臺之旁朝夕坐一室左右圖史論辨古今事當否搜竒抉怪日哦其間一朝戒行李束書策懷其綬而行人以公之簡古而屈于郡為惜也而不知其所樂焉今人坐黃堂閱吏牘對鴈鶩行較銖寸升斗豈其所欲哉勢驅之也在上者用不贍按虛籍而責之郡曰供我償我地要則事叢州大則責繁江陰居浙之西偏岸江而地狹賦入之上于大農者少公時舉按簿籍僅僅不餘詠中和之詩作清靜之歌歡樂子弟安燕長

老使道院之人聞義而不聞利此古循吏之化也可以
世俗語哉於其行蘇之人士各賦詩以識別而屬敦禮
為之序


送秦倅序

樂於近宦而憚於遠吏世俗之常情也古者為吏長子
孫其習久因以為姓氏故服其官惟其長子孫而守室
廬掃坟墓終其身無征行之勞後世東西南北之人相
易為仕懷章就戍交午於道路於是有飄零之艱有違

離之思有山行水宿崎嶇險阻跋履之勤有風霜冰雪
寒暑雨露凌冒之虞有土風氣俗語言嗜欲不能相安
相通之患士大夫裹章服受一闕於朝較長量短必便
且近是擇得則喜否則戚戚以為憂吁今古事不同其
類皆然男子之生桑弧蓬矢有四方之志何至牽於世
俗攀拘局束如是哉秦君羣用家金瀨之陽一朝戒行
李告朋友將貳政於瀘溪瀘溪距此三千里風馬牛不
相及人以羣用之賢而吏於遠為惜也而不知其有樂

焉今人閒居里巷相慕悅慶弔稱問相徵逐可矣而杖屨之所游不在西封在東境四方山川之奇巖谷之秀煙雲泉石魚龍草木之變可喜可愕可驚可懼曾不得洞心駭目宏意氣助為波瀾羣用將汴大江上康廬過赤壁山覽周郎之遺蹤南登岳陽濟洞庭觀怒濤之軒轟羣崖之噴泄溢九州而吞七澤南望衡湘北望江陵山徘徊壺頭問沅江之源訪酉陽之逸曲固將覽天下之勝絕大肆於言辭其樂豈易量哉可教我者願寄西

風



欽定四庫全書

集部
宮教集卷七至九

詳校官庶吉士臣翁樹培

主事臣呂雲棟覆勘

謄錄監生臣董誠

謄錄監生臣王人作

謄錄監生臣秦雲

欽定四庫全書

宮教集卷七

宋 崔敦禮 撰

論五首

易論

易者卜筮之書乎曰非也聖人懼天下之人蔽於卜筮之學而為之也以易為卜筮者假易以為怪者也曰周官之筮人太卜皆言掌三易何也曰周官非周公之書戰國陰謀之書也唐虞之典謨箕子之九疇三代之誥

誓皆言卜筮未嘗假易以為怪也此有以見周官非吾
聖人之書也曰夫子贊易或以卜筮以著龜為言者何
也曰原聖人作易之本也古者易之初興何為興也以
卜筮而興也卜筮之興何為而興也天以此與聖人也
天不與天下而與聖人者何也曰天之與聖人將與天
下共之也天生靈著與草木等爾烏知其可筮也惟聖
人則用之以四十有九而天下之數無遺算天生靈龜
與鱗介等爾烏知其可卜也聖人則灼之以七十二鑽

而天下之象無餘蘊天下之象數舉盡於蓍龜則吉凶禍福之幾藏於兆朕人之智識思慮所不能到者舉可得而知之也此聖人意也亦天意也然聖人憂天下深慮後世遠懼天下之民蔽於卜筮之說朝灼龜暮揲蓍規規然惟枯莖朽骨之求而不知修德以致福為善以避禍也於是不得已取蓍龜而則之以為易易之有象以龜之象而定之也易之有數以蓍之數而揲之也蓍龜之象數既寓於易聖人於是因其象數之所寓而繫

之以辭如是而為君子如是而為小人如是而可以趨吉如是而可以避凶事有可以行則告之以征凶征吉之辭事有不必行則告之以征吝利貞之辭翦翦斬斬如繩曲直不可移易是蓍龜之靈而先知者聖人以取而寓於易所謂蓍龜者已為芻狗已為筌蹄矣人能玩其占於方冊之上動靜取舍惟易之聽聖人以為吉從而趨之聖人以為凶從而避之是亦蓍龜之最靈者也不然揲蓍以為筮而求其數之行耗灼龜以為卜而觀

其兆之陰陽如是而驗其吉凶而於聖人之易無或擬議焉可也聖人既取蓍龜以作易後世不當以易而聽於蓍龜也後世不得已而以蓍龜占事可也不當假易以為怪也觀國之光利用賓於王聖人釋觀之六四人臣進而得君之辭也而周史筮之以為有土之兆困於石據於蒺藜聖人因困之六三居非其所自取危辱之辭也而武子筮之以為淫亂之占公用享於天子聖人擇大有之九三以大臣而膺君寵之辭也晉侯筮之以

為戰則克之祥斯皆假易之辭委曲遷就而信其說者也至於卦爻之辭有不委曲而遷就則又自為一說以飾其意畢萬筮仕於晉遇屯之比曰合而能固安而能殺公侯之卦也聖人屯比之辭有是乎成季之將生也筮遇大有之乾曰同復於父敬如君所大有乾之辭有是乎卦爻之義果如是則聖人必言之於辭聖人不言之而自為是說以強合其事不可也聖人有其辭又委曲遷就之不可也斯皆假易以為怪者也故曰聖人既

取蓍龜以作易後世不當以易而聽於蓍龜也後世不得已而以蓍龜占事可也不當假易以為怪也

詩論

古詩三千篇仲尼刪之存者三百後世儒者從而和之曰仲尼刪詩善者全而用不善者全而去非如春秋諸經或因或革相錯而成也余謂聖人之於詩非特刪之蓋嘗修之修之云者如修春秋之法一言一字必致其謹而未嘗輕也謂仲尼刪詩而不言修詩者不知聖人

作經之法者也輕吾詩者也六經之文載在方冊巍巍煌煌如天地之大日月之明河漢之渾浩山嶽之峻峙雷霆風雨之變化天下後世不敢以擬議也天下後世不敢以擬議者以其為聖人作也然而易之書成於三聖春秋作於仲尼禮樂周公之制仲尼從而定之天下後世不敢以擬議固也書之五十八篇不出於堯舜禹之典謨則出商周訓誥誓命之文不出於臯夔稷契賡歌吁咈之言則出於伊尹傳說周公召公之徒進戒納

誨之作天下後世亦不敢擬議固也至於詩所存三百篇是三百篇者上而王廷之公卿次而諸侯之大夫微而奔走之小臣巖谷之逸士下而至放逐之羈臣伶倫之賤伎又其下至於輿臺皂隸閭閻匹夫與夫婦人女子閨門房閨之陋其情動於中而形於聲因之而成詩是於述作之端初未為嚴且密也而天下後世亦不敢擬議焉非惟不敢雖欲擬議不可得也自秦燔書詩亡者數篇後世高才絕學之士因其意而補之類皆羞澁

曖昧不能得其萬一吁詩之為詩出於當時王廷之公卿者不可及也而諸侯大夫之詩豈不能及之出於王公大人者不可及也而奔走小臣巖谷逸士羈臣賤伎之詩後世豈不能及之出於賢人君子者不可及也而輿臺阜隸閭閻匹夫與夫婦人女子閨門房闥之詩後世豈不能及之有求其說而不得則曰民有喜怒而不能為詩皆當時賢者斷之禮義而代之作此非通論也夫聖人之於詩既刪之為三百篇矣而三百之中其初

固不能皆合於則胥當於理而中於道也而今之詩所以當於理而中於道者聖人修之也修之之法嚴故天下後世無得而擬議也碩人之詩曰巧笑倩兮美目盼兮素以為絢兮古詩也素以為絢者謂繪事後於素功也子夏曰繪事後於素功禮亦可得而後乎仲尼信其說知禮之不可一日後也故特曰巧笑倩兮美目盼兮而去其素以為絢之一句則知聖人修詩立法之嚴審訂而商權之類皆如此是豈特曰刪之為三百篇而已

哉又按仲尼修詩乃在於反魯之時而仲尼反魯當魯哀公十一年也春秋自哀公以前詩之篇章詞句與今之詩多相戾皆仲尼修而改之也有於一篇一章而易其序者若楚子誦武之詩其卒章曰耆定爾功其三曰數時繹思我徂惟求定其六曰綏萬邦屢豐年古詩也仲尼修詩則曰數時繹思我徂惟求定之句為齊之什而繼乎講武類禡之篇非武之三也以綏萬邦屢豐年之句為講武類禡之什而繼乎酌之後非武之六也此

於一篇一章而易其序也有於一句之內而變其文者
子舟誦烝民之詩曰剛亦不吐柔亦不如古詩也仲尼
修詩則曰柔亦不如剛亦不吐先柔而後剛懼其剛之
太過也成鱄誦皇矣之詩曰惟此文王帝度其心莫其
德音古詩也仲尼修詩則曰惟此王季帝度其心貺其
德音以文王之德而歸之王季尊所本也此於一句之
內而變其文也有於一字之間而潤飾其意者衛彪傒
誦板之詩曰敬天之怒不敢戲豫敬天之渝不敢馳驅

不之為辭非所以示其戒仲尼修詩則曰敬天之怒無
敢戲豫敬天之渝無敢馳驅無之者示戒之之意晉伯
瑕誦北山之詩曰或燕燕居息或憔悴事國則有怨而
自怠之意仲尼修詩則曰或燕燕居息或盡瘁事國則
有匪躬服勞之心也此於一字之間而潤飾其意也類
而推之不可槩舉則知聖人修詩如繩墨曲直毫釐不
敢違如權衡輕重銖兩不敢失修之之法比春秋而加
嚴焉不如是不足以垂將來而詔後世也豈特曰刪為

三百篇而已哉故曰謂仲尼刪詩而不言修詩者不知聖人作經之法者也輕吾詩者也知聖人修詩則三百篇之詩皆曰聖人之詩亦可也

禮論

人生不能無羣羣不能無爭人之初倥傯顛蒙而無知後為物役而機生情動而本遠雪霜風雨雷雹暴其外於是知架巢空穴挽草木取皮革飢渴牝牡之欲毆其內於是知噬禽獸咀果實是故有得失之殊途有好惡

之異尚有有餘不足之異致其有不得所欲則擊奪隨之交焉而爭睽焉而鬪齒利者齧爪剛者決然後有一人焉出而治之謂天下之民之爭求以止之必有以痛之斯畏焉於是加之鞭扑以笞捶其肌膚施之刀鋸以殘割其形體而名之曰刑然其爭又大焉者力大者搏勢強者軋徒衆者奪嘯呼踊躍草野塗血則向之痛之者不足恃也必有以脅之斯服焉於是為之師旅什伍之法為之旌旗鐘鼓之用為之干戈介冑弧矢矛戟之

械為之熊羆貔貙虎之威而名之曰兵息爭之小以刑
息爭之大以兵然人之爭心無時可已也人之爭心無
時而可已聖人惟曰吾有兵與刑營營乎日為殺人之
事可乎不可也故有微術焉就其起居動作之間創為
之法委曲而節文名之曰禮人有貴賤不知貴賤之等
聖人則設為朝聘位序之嚴車服采色之別使之有等
而不敢相越人有長幼不知長幼之序聖人則立為射
鄉飲食之節擯相紹介之儀使之有序而不敢以相亂

人有男女不知男女之別聖人則嚴之以媒妁之詞重之以幣帛之贄使之有別而不敢以相狎禮之制行於天下天下之人乃始日循循然束縛於名分之內常有所礙而不得肆其欲故其於息爭也有甚於兵刑之臨之焉周之衰二百餘年諸侯迭霸非不盛且大然睥睨周鼎縮手不敢取方且歛血會盟以尊周室周非有兵與刑以制之也禮存焉也嗚呼聖人息爭之道至於禮而極矣或曰禮本於太一謂出於兵刑之後何也曰太

一禮之本也從而表飾之使著於世聖人也易之有需需飲食之道爭所由起也故以訟訟而不能止故以師師之與訟能比而蓄之不能有所辨故辨上下定民志終歸於履而後已此聖人意也刑兵與禮之序也

樂論

古之聖人所以愚民之思慮役民之耳目者何其至也聖人愛民之心固欲其智不欲其愚固欲其安不欲其勞而必求所以愚而役之者是非聖人忍於愚民役民

也天下之民至弱而強至柔而剛彼其思慮可使惟吾
信而不可使之自信其思慮彼其耳目可使惟吾用而
不可使之自用其耳目如是而天下皆君子則可不幸
而有小人者雜乎其間則將任其思慮耳目之所及無
所往而不至矣易曰鼓之舞之以盡神孟子曰殺之而
不怨利之而不庸民日遷善而不知為之愚而役之之
謂也樂也者真聖人愚民役民之具歟民有思慮耳目
其喜怒哀樂感於中而形於外有不可強而使之也今

無故而使人喜雖千金與之而容不改無故而使人怒雖白刃臨之而色不變喜怒之不可強也如此而樂之所感則有可以使人喜可以使人怒者矣強而使人哀雖泣而不悲強而使人樂雖笑而不和哀樂之不可強也如此而樂之所感則有可以使人哀可以使人樂者矣故有作為發散寬大和動順成之音則民莫不躍然而思喜作為粗厲猛起奮末廣賁之音則人莫不奮然而思怒作為志微噍殺困瘁趨數之音則民莫不愀然

而思哀作為嘽緩慢易繁文簡節之音則民莫不泰然而思樂夫民之喜怒哀樂出於其情之自然不可強勉而樂之為樂獨能使之喜則喜使之怒則怒使之哀則哀使之樂則樂如木偶在伎人之手左右動作惟機絨之從雖有思慮耳目莫克自信自用是故有以愚而役之使然也夫樂之愚民役民一至於是竊嘗求其所以可得而知乎曰不可也聖人因人心之自然審聲音之所感而寓之于戚羽籥鐘鼓管磬之末以為樂非有變

化之妙而足以動盪人之精神非有機械之巧而足以
舞蹈人之手足非有藥石鍼灼之方而足以流通人之
氣脉方其民之聽之而喜也知其為喜而不知其喜之
由非惟民不知之而所以使之喜者雖聖人亦不得而
知也及其民之聽之而怒也知其為怒而不知其怒之
由非惟民不知之而所以使之怒者聖人亦不得而知
也及其民之聽之而哀聽之而樂也知其為哀樂而不
知其為哀樂之由非惟民不知之而所以使之哀使之

樂者聖人亦不得而知也雖然彼聖人者亦欲制人之喜怒哀樂者也曰救其始也天下治亂之端善惡之理吉凶悔吝之殊皆生乎喜怒哀樂而喜怒哀樂者發於其心動於其情不可以形求不可以力致者也天下之事有可以形求而力致而刑罰得以威之號令得以語之政事得以治之至於不可形求而力致而吾無其術以愚而役之則邪僻乖亂之心得以乘間而入雖有刑政號令何所用之譬之醫者之治病也病寒邪以陽藥

治之病熱邪以陰藥攻之此皆切脉觀色可以形求而力致者也至夫思念志慮之微一失其正而喪心失神之患隨之攻之不能助之不可雖有盧扁無以治之嗚呼天下之治不先求其不可形求力致者而御之刑罰可得而威邪號令可得而語邪政事可得而治邪

文帝論

世言文帝和親匈奴及其背約入盜令邊備守不發兵深入以為文帝仁厚之至甚非通論匈奴之陵漢固也

而於文帝為已甚帝屈已而優容之非仁也勢也帝之
治以略言之曰仁則似矣觀其犯蹕者有罰法也而帝必
欲殺之以泄其怒盜環者有誅法也而帝必欲族之以
行其威帝之於事其小者不能忍如此彼其二十三年
之間遭匈奴之憑陵今年寇河南明年居北地今年入
雲中明年掠上郡待之愈寬而寇之愈急禮之愈下而
侮之愈不已包羞忍恥如此豈其本心哉況匈奴嘗殺
一都尉帝即赫然震怒欲勒兵自將鼓行而前當是時

非羣臣切諫於外太后固要於內則兵連禍結矣相其胸中日夜憤惋求一快意非淺淺也然卒不與之敵者非仁也勢也帝之時外有匈奴之憂內有諸侯之患諸侯徃徃尾大於身指大於臂包陸梁不軌之心覲間伺隙以幸國家之有事使文帝忘自照之機懷泄邇之念掃境內而從事於匈奴則諸侯之兵必乘虛西向漢之社稷未可知也且文帝嘗幸太原欲北伐匈奴丞相之兵未及越境而濟北之叛師已起是其於匈奴之強安

得而不少忍也哉譬猶一身之間有腹心之患有膚腠之疾今有人病方在腹心未知所以療之之術而膚腠之間有不利焉不能少忍以待腹心之安悍藥毒石雜然而並進而膚腠之疾未去而吾之腹心已困有不速死者幾希矣此文帝和親匈奴之志也其後一傳而至孝景用主父偃之謀分建子弟而諸侯之勢弱矣再傳而至於武帝中國曠然無內顧之憂於是力征深入大舉以伐匈奴匈奴消縮遠遁甘心款塞請命於下吏而

終漢之世邊陲無警嗚呼漢之為漢所以圖匈奴者何其不苟也哉

策問四首

中庸發題

禮記一書其言制度文為之用刑名度數之學備矣而根原所自皆由中庸大學中出學者於此苟有覺處則威儀三千曲禮三百皆吾性分中物耳今日之說請先自中庸始中之一字聖人傳心之機要授道之關鍵子

思之學出於曾子曾子之在聖門其傳道之際蓋辛苦艱難而後有得非如古者以聖傳聖之易也古者自堯舜至於禹湯文武周公相傳是道或應於猝遽之間或契於數百年之遠彼以心傳此以心受心機所照一一相印天地鬼神四時日月不能間礙至於夫子從而游者皆中智之士難疑答問其言無不及惟中一字未嘗敢以語人夫子之不語人非祕也蓋中智之士人欲未除利心猶存其於道也可使得之於自覺不可使受之

於聽聞得之於自覺則其得也難而功大聽之於所聞則其得也易而無力是故必託宿於物假途於事隨其根性示以入路教人以禮樂使人於禮樂上求中教人以仁義使人於仁義上求中教人以忠信使人於忠信上求中教人以孝悌使人於孝悌上求中庶乎觸之於彼應之於心一念了然中固我有然而七十子三千之徒竟無一人能領其機者幸而有一顏子不幸交臂而失之夫子憂焉於是舉其極處示之而名之曰一夫一

也者所謂吾無隱乎爾者也所謂如有所立卓爾者也
夫子嘗以此示之子貢曰賜也女以予為多學而識之
者與對曰然非與曰非也予一以貫之使子貢能領此
機則必一語之下雷驚風動間不容髮惜乎不能識之
默無一辭以措於是不得已又以此示之曾子曰參乎
吾道一以貫之惟曾子識夫執中之要正在於此故略
不嫌避當機而發應之曰唯一唯之對大中豁焉夫子
平生憂勤焦勞求得其人分付是道而曾子一唯畢其

能事嗚呼大聖人之門陶鍊人物可謂難也已矣曾子
既得是道見夫傳受之難如此故常覆護此機不敢輕
示觀其答門人之問則曰夫子之道忠恕而已矣是亦
聖人設教之遺意也乃若子思親得其傳於曾子者也
謂夫子沒不及見而師之又世無曾子此問此唯寂寥
誰傳於是盡以所學作為中庸以示後學中庸之書出
而聖人傳心之機要授道之關鍵一切陳露而不可掩
漏天之機泄神之秘而出於子思之不得已學者讀其

書識其原苟能於意言之外自有覺處則無負於子思
無負於曾子無負於吾夫子矣其勉之哉

問民力

民者國之根本也根本一搖枝葉隨仆是以有天下者
愛護休養非甚不得已不敢少撓其間故雖廊廟焦勞
而迫趣之聲不至田里國務倥傯而急呼疾走不見於
道路懼搖其本也恭惟主上聖德如天含覆萬宇國家
晏安無有外事方欲培根固本以圖不世之烈視一物

之不平一民之失所救卹保惠惟恐不及雖堯舜三王
之用心不是過也是宜人情愉愉既泰且舒有以上副
九重愛養民力之意今州縣之間騷然無聊郵無羽書
之馳而符檄如星火軍無發興之急而調度如鼎沸四
境無戰爭之聲烽燧之警而吾民驚懼憂患如不朝夕
此其故何哉意者上下逃責無敢避其事與然澄源則
流清宜必有術矣周之時外有昆夷之患北有玁狁之
難命將遣戍若不暇給今觀鹿鳴諸詩君臣上下優游

燕樂天下之民方且為飲食之用方今中外乂寧而煎熬峻急乃反如何也諸君講聞高誼憂國愛民豈無可行之策願詳言之有司將采以獻

問三江五湖

楚澤雲夢之廣楚人能賦之晉都山河之固晉人能言之四方山林川澤之辨不由其人而議焉未見其當也諸君吳人也敢以吳之事問書曰三江既入震澤底定范蠡乘扁舟出三江之口入五湖之中則三江接於震

澤若無疑矣說者或窮其源而取山岷山崦山之遠或循其流而取江岷江九江條分之叙或別其勢而取松江浙江浦陽之隔意者三江之名固自有所邪禹貢所載何獨於震澤言之也司馬氏史記索隱以吳松為南江毗陵為北江陽羨為中江圖志是其說謂三者在震澤上下入於海則勢有所泄是以底定此為得矣然禹之導江悉匯於彭蠡而南北中之流始分故彭蠡潴然後三江入則三江之名又似在彭蠡之左右者前之說果

信乎否也五湖為太湖之異名謂其所納之流有五也
張勃言之圖志又從而是之矣或者以其旁之四湖與
太湖而五其說不為無本及觀國語載吳越戰於五湖
而左氏直謂之笠澤異名之說似未可輕議然太湖之
廣三萬六千頃環五百餘里周旋長洲毗陵陽羨雪川
之間自湖至海並岸之浦百數則所納豈止五而已哉
至於周官言揚州其藪澤曰具區其浸曰五湖則太湖
之與五湖本自為兩途前之說又皆不足據矣豈得無

至當之論古者博物君子恥一事之不知窮河源探禹穴無所不至今三江五湖近在於此而不窮其實不可也願詳言之以祛所惑

問地利勝敗之異

兵無常機地有定勢不易之論也昔者地形圖於充國漢宣得以成功山谷陳於馬援光武得以決勝蓋兵雖以臨機為神至於審形勢擇地利則策之上者也主上以聖神之資運英武之略當宁慨然有復古之志士生

斯時蒙被教養其於山川之險要所當講明而熟究也
今願有問焉漢高由南鄭出故道襲陳倉而破之遂下
三秦取之之易如此及諸葛亮出散關司馬勲出子午
道掠秦西鄙皆欲由陳倉以窺關中勢非弱於漢也然
卒不能越其險而北或云魏延嘗言於亮請從褒中循
秦嶺而東當子午而北不十日可至長安亮不用其計
故無功乃若勲之敗則又必有說矣不然高祖陳倉之
道果可行矣否乎桓溫自克伐燕由金鄉鑿鉅野三百

里以達於湖其行可謂徑矣然僅止枋頭而敗及劉裕
尋溫故迹乃長驅河上與諸將表裏進平河洛其功視
溫反倍或云溫之失在於得譙梁而不能通石門若裕
之於石門亦嘗通矣否乎夫其地同其強弱之勢同而
成敗乃異豈得無至當之論冠圓者知天時履方者知
地形為其服而不知其道古人恥焉願悉言之無略

欽定四庫全書

宮教集卷八

宋 崔敦禮 撰

啓三十首

賀梁丞相進書轉官啓

敷告治廷誕揚褒冊公宰之尊無不統有嘉定令之勤
帝王之制可舉行爰茂報功之典槐階增峻袞路生輝
恭惟某官敦大而有容剛方而無撓憲章文武而所識
者大淵源游夏而不失其傳非王道不陳得孟軻之

直養以天下自任如伊尹之先知克左右以宅厥師善
彌縫而藏諸用屬茲憲令浸紊條綱潤色之討論之不
用釐於邦采主張是綱維是蓋息紛於教功追春秋筆
削之嚴辨庚甲後先之次既著為律疏為令以庶邦惟
正之供必爵以德錄以功使萬世有辭於永爰昭異數
用煥徽章進巍級於文階衍真畬於采戶寵隨名至德
與位尊蕭相圖書較若莫逾於畫一漢家號令煥然可
致於登三福祿無窮勲勞甚盛敦禮夙蒙知己每劇銘

心自憐蹇剝之多尚費乾坤之造望相君翹材之館想
見光華繫諸侯泮水之宮坐傾意氣

賀陳丞相加少保啓

誕揚明制光拜殊恩星使從天奉三孤之典策夏車照
路新一品之威儀中外聳聞搢紳交慶竊以盛德者必
寵數極而後稱位高者惟物望重而乃宜浩乎天下之
顯名至矣朝廷之尊爵善美兼具古今所難恭惟某官
廣大閎深光明傑特屹如底柱立於中流巍然巨山鎮

夫羣岳忠誠結主身雖外而眷益尊道義光民口不言
而人自服久厭煩於揆路茲均秩於留京條教簡清恩
威決洽萬室享阜豐之樂十城蒙安靜之休嘉績殊庸
倬彼政成之最崇茲峻秩優哉帝簡之深乃眷貳公是
為亞保班行肅穆具瞻希冕之尊旗纛光華咸識通壇
之顯褒榮絕等禮貌加隆賞中伯之蕃宣斯為盛甚錫
周公之袞繡佇即還歸敦禮揣分至微受知特異茲與
觀於盛事實倍喜於常情再念孤蹤密依數仞竊起梯

雲之望因忘躍冶之慚跂外朝左棘之聯益傾意氣置清廟黃鐘之列尚丐吹噓

賀陳丞相帥建康啓

拜恩中陞分鎮陪京天語粹溫親授保釐之冊民情愛說尚存總芟之棠開府云初載塗有喜恭惟某官為國大老作民先知安危治亂而自任以誠去就行藏而弗失其正德業深厚雖處晦而譽益尊道義純全故不言而人盡服頃厭鈞衡之柄屢淹屏翰之居惟爾多方成

渴為霖之望敷此大惠暫勤典鑰之行眷是名都素孚
善政吏既諳於條教民久洽於恩威聊資卧護之安用
釋顧憂之重人惟求舊恐席暖之未遑民具爾瞻見袞
迎之非晚某逖違墻仞屢易年華自惟蹤迹之乖莫致
寢興之敬仰鎮臨之甚盛欣窮困之焉依願少須臾觀
報成於政最於女信宿行賦詠於公歸

代丘守賀揚州王樞密帥開府啓

抗旌臨部擁節開藩紫極凝嚴照星野斗牛之次碧油

整暇護雲屯箕翼之師威譽聳傳疆陲震肅恭惟某官
洪深而剛毅敦大而直方敏識絕人負天地英明之氣
壯猷經遠通古今治亂之原早被遇於冕旒久贊猷於
帷幄晉國作三軍之制共嗟謀帥之難衛公臨五筦之兵
亟奮請行之勇是用暫輟西樞之望徃分北顧之憂當
一面以建牙總全師而制閭百城倚重無邊風塞馬之
驚丹詔䟽榮當相印命珪之錫某揣材無取荷眷實深
自違行旆之光祇劇搖旌之想地殊吳楚悵莫及於馬

牛風寄東南同賀成於燕雀

代葉倉賀虞使相帥蜀啓

寵辭台軸出撫坤維希冕篆車脩威儀於亞保高牙大
纛嚴節制於中權典策傳行搢紳聳歎恭惟某官洪深
而剛毅敦大而直方敏識絕人負天地英明之氣壯猷
經遠達古今治亂之原勇見義以必為智臨機而益果
笑談却敵親焚赤壁之舟慷慨興邦誓擊中流之楫蕃
裔喪氣朝野承風久積望於要塗旋躋榮於魁柄彰施

王度掌握化樞乘千齡相與之期恢萬世無疆之業勛
勞甚盛眷注方深遽形納政之辭期遂退身之逸觀來
章之屢却終去志之莫回裴令未衰宜護北門之寄衛
公雖老暫臨西海之師錫徽號以便蕃賁寵章而赫奕
肆疇體貌勉寬顧憂傳檄而定三秦當有光於漢業破
斧而征四國豈久詠於周人即觀袞繡之歸式慰冕旒
之想某受材無取荷德最深惟廊廟之勢嚴帳門牆之
情隔永懷恩遇祇劇銘鐫茲盛事之播聞倍常情而增

喜馳使臣之軺傳久睽禮絕之儀望丞相之安車行展
班迎之敬

代賀沈樞帥荆南啓

光膺帝制出鎮帥符登四輔以贊猷久積西樞之望總
十連而作鎮用寬北顧之憂郵驛播傳華裔聳聽恭惟
某官濟時鉅德命世宗工負應變之材智酬方而無滯
勵匪躬之節勇見義而必為早被眷於宸旒亟進躋於
政路謨明國論化幹天樞惟荆楚之輿區控巴吳之要

會屬大事而當一面孰為上行謀元帥而作三軍莫如
公重爰輟筦樞之任往分制閭之權草木莫不知威旌
麾為之改色賢於長城遠矣姑卧護於雄藩是以衮衣
歸兮佇疾馳於召節某居慚庸鄙夙荷獎提聞顯冊之
傳行激懦廉而起立旗旄夾道佇聽呵從之臨轡袴迎
郊當致小侯之敬

賀魏丞相復職啓

發號明庭還榮秘殿隆名赫奕具昭帝簡之深懽誦流

傳咸切公歸之俟恭惟某官經邦元老間世巨儒事業著於兩朝德行冠乎一代出藩入輔惟脩聲於忠勞坎止流行了不驚於得失退遂碧溪之樂遠追綠野之高辭榮鼎萬而道益尊晦迹山林而名愈白俟應簡注顯有褒嘉雖輿論之未充諒綸恩之皆至人惟求舊即觀周袞之迎民具爾瞻悉起傳霖之望敦禮自違墻仍屢易年華屬稔積於罪愆洊罹罹於憂禍哀思匪極但驚日月之流名姓不祥怨致寒暄之問

賀許正言啓

恭審光被宸綸晉司言責正人生氣公論屬心竊以草
茅寒素口誦當時之故而常苦無路以獻誠措紳大夫
心知時政之非而不敢出位以要譽雖在道人使諫之
世常懷有闕莫聞之憂設為補遺之官專以風議為職
上而君舉之得失下而官聯之正邪大而社稷安危兆
眚之間繁及號令否若幾微之際凡關有政皆得肆言
淺之至於誦祈招道饘粥而人不議其迂深之至於引

帝裾攀殿檻而衆不指其過士而得逢其亨會時哉足
展其生平而況三宅並登四門無壅有猷則告何用不
臧恭惟某官雅量淵沈清規峻整博大高明之學追配
古人雄深辨麗之文標表後作一日掀翔而名塞乎宇
宙十年流落而志適於江湖迨趨訪對之嚴深結眷知
之異七日復而有道雖云消長之常六月息而遂高益
見扶搖之遠玉府擅校讐之譽粉闈揚端靖之風爰陟
諫坡允符輿論昔日布衣得方寸之地猶能明目張膽

以進謹言今以爭臣親咫尺之天豈憚逆指犯顏而論
大事諒三進以及雷當一言而興邦流涕陳風俗之原
願聞耳矣抗疏陳高麗之役更切遲之敦禮傾幸攀緣
猥蒙盼睐自別慈恩之會浸迷簿領之塵下館翹心仰
高惟久尺題展敬修問莫遑側聽詔除倍傾意嚮國多
君子未可議共知吾道之尊朝得直臣必太平敢先有
識之賀

賀吏部陳尙書新除啓

恭審入覲宸廷晉長銓省方召還之下謂當政路之立
登逮除目之行靡有輿情之未厭恭惟某官洪深而肅
括敦大而直方素所經綸措國勢於寶鼎之重若時規
畫玩敵人於指掌之間與道偕行遇坎則止有蘊莫見
善刀而藏孰謀不臧而召後來之失何見之早允合當
時之言茲趣冠於禁嚴實漸躋於翊輔論國體於治亂
安危之際士方傾屬於斯總人材於身言書判之間公
特游戲焉耳敦禮頌緣文藝濫託門牆逖聞成命之傳

爰修竿牘敬致責賢之義少贊涓埃

謝魏丞相薦剡啓

泮水充員正負素餐之媿公車剡奏遽膺華袞之褒方
捧檄以欣然覺登門而榮甚恩深特達感極鐫銘竊以
進身之階未免求聞於先達知音之遇所難見聽於鉅
公蓋惟人物之評允繫鈞衡之論攀緣匪易遭際甚艱
固有掃舍人之門而藉以求通至或上宰相之書而竟
於不報若乃事逢其適志遂所圖臚情之墨未乾薦士

之章已至靖惟忝冒可謂闊疏如敦禮者芻俚材疏株
愚智短啖牛心而快賞夙勉壯圖咀熊膽以自強居懷
僻學茲濫巾於講席獲肆志於塵編仰屋著書萃嘲評
於尚白閉門作字殫思慮於炙青但矻矻以惟勤頗棲
棲而焉薄竊嘗聞道於昔日所願記名於下風然細者
為楠大者為杗莫匪因材而有取顧擁不中繩卷不中
矩則將無用而安收深懷躍冶之慚徒起望洋之歎敢
圖裁鑑罔棄凡庸以一言一行而識其生平之為遂三

沐三薰而置之子弟之列寵其微分被以美辭念讀書
僅記於姓名未嘗博極且作語漫知於平仄自媿拙艱
而乃借其學贍之稱加以文雄之譽謂宜到遠更厚所
期在已反求於實何有登晚脰於尊俎之列昔固懼其
非堪飾土木以錦繡之文今愈知其甚過茲蓋恭遇某
官甄陶士類表燭人材以羅絡古今之術而下取於空
疎以經緯天地之工而俯收於譎薄荷恩若此撫已知
榮敦禮敢不勉厥進修益其涵養於斯二者何以副溢

美之言苟有一焉亦足為知己之報

代趙宰謝諸司列薦啓

下邑承流方積素餐之愧刻章合薦誤膺華袞之褒寵
忽出於非常譽深慚於過實竊惟建業要衝之地是為
名流鼎集之區開帥閫以建藩登使車而攬轡非搢紳
之重望則廊廟之近臣皆一時鈞鼎之儲簡九陛晃旒
之眷孰不萌於攀附期少借於輝光然取知固難於異
同而求進豈無於遇否惟善人能舉類曲借吹噓諸大

夫皆曰賢誠為希闊顧茲公舉宜屬異材如某者識昧以踈性愚且拙隆師親友猶知行已之方應舉覓官徒為干祿之計夤緣宰邑強勉蒞民推所學則必務於力行持其已則敢思於自怠察催科之積弊必簡其目以深防吏奸懼盜賊之肆行每嚴其責而力除民蠹訟不忘於審聽刑惟近於用寬雖懷黽慤之誠未見毫釐之效而乃迹其學術褒以廉勤有畏威不擾之稱借揆法當情之譽退求諸已實愧乃心茲蓋恭遇某官名冠倫

魁道升閭奧奕奕明堂之柱棟煌煌清廟之璫璵方其
參率僉言俯收後進自惟凡陋之質曷稱獎提之恩某
敢不益勵前修愈堅素履諸公今出門下固已蒙交舉
之榮賤士見遇大賢當力圖知己之報

謝蔡總卿京剡啓

郡序充員本無題目公車剡奏乃有姓名深銜特達之
恩輒敘感銘之悃竊以有俊即俊為政舉爾所知惟賢
知賢觀臣以其所主自往古進賢之浸遠致清朝薦士

之絕希但問燕公嗣魯公甥類皆然耳不數顏氏孫閔氏子良可憐哉炎炎噂沓之門擾擾馳奔之地掣其肘而奪者悉由非意謀於心而諾者寧復自如此所以僉人腐夫掉臂而爭先端人良士卷舌而藏口若乃事無其素人莫之先一見已定其生平片言遂加於褒飾正宜於古人求耳豈得於茲世見之必有軼材乃堪明舉如敦禮者株愚智短芻俚材微蠹編雖力於講論徇曲不離於陳腐本非時用偶然束縛於官常方自山來安

能曲折於人事亦惟憑藉使者二天之大乃得棲遲諸
侯泮水之間而術業荒疎性資簡質自甘為迂儒之陋
學何以辱明公之重言敢意誤知遽先論薦貢昌歆於
玉食竊歎嗜偏登太羹於廟堂亦將存古曲借吹噓之
賜亦知刻畫之勞事既罕而遇難恩愈深而感切茲蓋
恭遇某官性天宏闊心地坦夷解十二牛而斲若新材
具見恢恢之裕息九萬里而風在下功名觀鼎之隆
方且以獎提後進為政經以收拾英材為已任顧茲庸

妄亦被薦揚敷禮敢不勉厥進修厚其涵養心焉自省
何以副溢美之言學以力行亦足為知己之報

賀蕭察院啓

光膺芝檢進陟栢臺國用正人士無異論或謂朝家有
碩大無朋之福乃付網憲於莊重不撓之臣顒昂之色
足以肅穆周行正大之言足以維持公道精神所向風
采益新衆皆曰賢國由是重恭惟某官天球比粹廟璿
凝珍以懿文興學根柢六經以亮節清規羽儀多士汪

翔令問登陟華津議禮奉常久著詳明之譽繩愆憲府
更觀謇諤之風即被殊遷盡施素蘊某夙親餘論竊歎
英猷竦聞除命之來倍極得人之喜繡衣行部阻陪賀
客之趨鐵柱端朝逖仰官儀之盛

上平江汪守啓

改命類宮抗塵大府望門墻之峻坐知觀海之難親道
德之光預期蒙露之潤恭惟某官本朝碩德吾道宗師
聲塞天地而居有謙虛抑損之誠學洞古今而達以直

方正大之氣天之所降以開覺一世上之所待以經綸
四方泓渟台鼎之規偃息藩州之望惟從容中外之際
皆能為國之光輝顧尋常進退之間初不係公之輕重
竚孚輿德益懋熙圖敦禮鄉校諸生儒科晚進一命埃
塵之域十年萍梗之蹤得次省曹不才宜汰濫巾師席
非稱為慚寧獨冷之為懷竊羣嘲之是慮斯文不墜寄
子敢自許以抗顏天下中庸有公庶得歸於折衷

迂平江丘守啓

寵膺宸綽就易守符四境聞鷄犬之音既允沾於河潤
兩界接耕桑之迹將均芘於棠陰凡在帡幪率同慶抃
恭惟某官氣有所養而剛大學無不通而高明四十圍
溜雨之皮材自難於小用九萬里培風之翼志不局於
卑飛籥魏級以舒翹蹕華途而登步將膺柄用姑試事
功班郡國之春去天不遠見長安之日易地皆然當即
馳尺一之書豈久紆丈二之組敦禮頑冥益甚竒蹇異
常遲次省曹披沙見類濫中師席附贅為慚側聞千騎

之來深激寸心之喜諸侯泮水庶善頌之可賡刺史二
天豈私恩之敢冀

通向守啓

政成苔水地易吳都符竹洊分優被九重之眷溪山相
接載披三輔之圖荷茲帡幪敢申歡慶恭惟某官天趣
高明風規峻整材鋒淬礪數千牛及發於硯宦路扶搖
九萬里風斯在下攬轡著澄清之略擁麾高辦治之功
飛蓋鼎來政及班春之候賜環催拜佇陪半夜之談敦

禮鉉陋儒詩書素業省曹遲次既類披沙講席濫巾
更慚附贅先生萬古愧奚有於師資刺史二天倘可逃
於吏議

通鄉守啓

隨牒轉移將道扮榆之里望風懷想敢修桑梓之恭敬
掣齋鈴用馳書牘恭惟某官夜光寶器喬木故家一朝
解十二牛地有餘於游及六月息九萬里翼姑戢於垂
雲行頒尺一之書八奉九重之對敦禮久焉飄泊適此經從

鳳集江華有媿楊公之瑞鶴歸遼海空慚丁令之來

代人通鄉守啓

十年流落未忘越鳥之吟千里來歸願識荊州之面披
承非遠欣幸良多恭惟某官德宇粹夷性天昭徹政妙
斷輪之手材全游及之神借重江城聊佩左魚之貴言
還帝里即符畫鹿之祥某遠逐宦遊飽聞政譽徒愧小
人之懷土望舊國以悵然願同君子之居邦事大夫之
賢者

代王憲答向守啓

光膺中詔易鎮巨藩接壤聞風已著恩威之素褰帷布
政載觀條教之孚恭惟某官敏悟絕倫清機昭理六月
息九萬里久展修程一朝解十二牛共高餘及歷試循
良之績即登嚴近之途某宦路差池風期遼邈方喜承
顏之邇遽承貽翰之先感佩之私敷宣罔既

代李倉回向守啓

顯膺宸綽就易藩麾遺愛在人增苔雪溪山之勝先聲

及物動吳松風月之輝與在聽聞良深贊喜恭惟臬官
清機昭理沉識潛微昂昂彌高發盛名於一世恢恢多
裕絕敏悟於千人使星高峻整之風侯屏著循良之譽
奏計方優於吏課改符旋被於恩書褰帷露冕而見吏
民佇聞異績珥筆持橐而列侍從即展宏圖某自顧凡
材濫將隆指輶車游歷屢逢傾蓋之歡鈴閣從容行慰
盍簪之願

代葉倉答張守啓

鋒車趣覲榮分五馬之輝函教鼎來遽被雙魚之貺服
撝謙之過厚慚展慶之有稽恭惟某官廟璉珍凝簞金
學富植豈規而輝國流華問以被民朝一人而拔尤首
膺鶚薦畫三接而用錫親畀魚符豈州縣之職徒勞將
公侯之家必復祥已符於畫鹿世當嗣於青氈某久矣
遊從茲焉幸會扶風之課最於三輔知河潤之溥沾刺
史之職察以六條庶露行之有賴

賀馬守啓

顯膺宸綽出鎮輔藩九棘平反夙著名卿之望一麾分
守爰膺良翰之求恭惟某官天趣高明風規峻整發盛
名於一世絕敏悟於千人卿序聯華垂近金鰲之直藩
城擇牧聊分銅虎之符眷威譽之素隆茲輿情之允協
紆丈二之組即聞奏課之優馳尺一之書當奉受釐之
對敦禮詩書素履鉉輶陋儒遲次省曹披沙見汰濫巾
師席附贅為慚側聽千騎之臨深激寸衷之喜先生萬
古愧何取於師資刺史二天庶可逃於吏議

謝丘守京剡啓

泮水授閒本無梯援公車剡奏乃有姓名檄初捧以欣然門獲登而榮甚竊以昔者論薦存乎至公士之求知貴於以正故車下之歌不由於借助而河東之辟盡絕於屬書古道邈然流風竭矣容容徒炙手之附帖帖惟捩鼻之從有以先容雖枯木朽株而增重無因自至以夜光明月而見疑是非罔出於本心取予浸流於市道敦禮不肖抑又奚云方自山來不知曲折於人事豈堪

世用偶茲束縛於官常僻拙自喜既莫求先容審訥無
華又不能巧進畧無蜉蟻可援之勢徒有蚊虻求附之
心倘諸公令出其門固所願也求貴人借助以勢詎肯
為哉自甘為無用之迂儒何敢幾薦賢之重諾豈意高
明之鑒不遺介特之蹤登太羹於廟堂亦將存古貢昌
歎於玉食竊歎嗜偏茲蓋恭遇某官高明自得於天資
予諾不隨於世俗以收拾寒士為己任以矯拂頽風為
政經曾是妄庸亦叨獎拔敦禮素雖至愚而極陋今益

自信而不疑直道是行終戒用人之誚厚恩難報漫懷
知己之私

賀王守改知建康啓

恭審政窳侯藩位隆連帥江山相望既惠養之素孚旌
棨就臨喜教條之均被帡幪所暨閭閻惟同恭惟某官
興業丕天清規輝國海涵地負浩乎學問之內充月潤
日光倬彼聲猷之外發以一日而先多士由片言而結
上知紬書增東壁之輝持被應列星之次歷華貫於鳳

閣鸞臺之地譽處彌休望清光於鷄翹豹尾之間班行
益峻屬倭承明之直荐分刺史之權智妙神明仁深寬
宥折獄無非於破的撥煩罔見於金牛德洽廬陵召伯
之棠猶在化行宣郡齊侯之政已成爰膺斧展之求亟
畀玉符之託由列郡而付留都之重實勸乃功因近藩
而開師閫之崇就宏斯政矧時建業實號要衝箕翼舒
張列干屯之玉帳虎龍蟠踞護萬雉之金城人物浩穰
山川盛麗居守之任茲借重於名臣入拜之階姑積資

於鉅望敦禮迂達陋學偏側凡材追時好以取世資偶
叨科級去民畝而就吏祿遂困塵埃惟平時慕用之深
有邇日趨承之便官程迫趣方恨遠於崇墉郵驛傳聞
喜獲依於大庇

服闋上周內翰啓

自遠聲光浸罹憂患哀思匪極但驚歲月之移名姓不
祥莫致寒暄之間追茲終制爾殘生收召散魂強迫
陪於人事飛馳精思實嚮慕於師門伏審演潤金鼇講

論清燕明靈具介福祿叢臻恭惟某官學富經綸器全
端亮高文大冊發為天子之光勁節冲規播在輿人之
頌雖躬謙之已甚如物論之浩然雍容翰墨之林樞軸
鈞衡之望謀參禁密被眷寵以方深禮絕坐間諒登庸
之非晚敦禮伶俜弱質孤露餘年省厥艱難有如痛定
奄然喘息豈自意全永纏風樹之悲曷勝松楸之戀從
先王之禮始不齒於三年和夫子之琴冀得門於數仞
金氣澄肅玉堂靖嚴惟善含於天和即進登於台軸

上王尚書啓

隨牒轉移久客諸侯之幕望風傾想未登夫子之堂盖
惟位貌之間殊且復姓名之埋沒蔑聞介紹敢干冒進
之誅自分陸沉但近退藏之守迹雖隣於簡外心實注
於高明不修參侯之儀曷見依歸之悃伏惟銓衡多暇
寶練維和積有休祥叢護興寢恭惟某官以堪輿浩直
之氣負邦國經綸之材智慮精微而發之以剛論議慷
慨而据之以直力行已學親結上知善策奇謀允矣淵

衷之合公言直道翕然衆正之孚周旋八座之班行重
疊諸儒之講席禁途積望久已熟於民瞻揆路登庸諒
方深於帝簡敦禮迂愚自守蹇薄多竒治亂之原亦嘗
志一二人者功名之事豈得無尺寸望焉初心坐歎於
乖違半世已成於蹭蹬顧屯邅之已甚曾趨操之不移
竊嘗嚮慕於門牆所願依承於几杖事隨勢奪時與命
睽披雲霧之天曷慰平生之志望星辰之履不知精爽
之馳

上方平江啓

祇奉詔綸載新郡綬政成甄越已膺計最之褒地勝吳
松更倚老成之重江山改觀草木知威恭惟某官吏道
宗師士林耆舊材大備更於盤錯望尊威服於典刑數
千牛游及之餘劓若新而不頓九萬里培風之力積既
厚以彌高時惟黃髮之英深簡丹心之眷去天不遠既
頒郡國之春易地皆然更近長安之日豈久紆丈二之
組當即馳尺一之書敷禮鈐幣陋儒門墻下士繫一官

而漂泊瞻數仞以翹思側聆千騎之臨深激寸心之喜

上范舍人啓

逖違風度浸越年華望北海之洋久已遡精神於門墻
之下歌南山之粲庶幾定平生於言語之間敢勤躡履
之迎用慰執鞭之慕竊以先覺達後覺雖有迪於見聞
下風應上風亦相尋於氣類萬寶畢趨於都會衆流爭
湊於巨川寥乎大雅之哀甚矣斯文之弊瑣碎焜耀既
不能混融天地之純全朴鄙艱深又無以轆轤日星之

經緯哇咬衆作鹵莽一塗遺音泯泯以無聞餘瀝涓涓而將竭欽惟文伯大起儒風道四時之氣而洩其餘落百氏之華而食其實測之益遠灝灝大而渾渾全動而徐盈涵涵停而秩秩積驚英猷而溥暢靡羣作以披紛張咸池而樂洞庭已眩鈞天之奏登泰山而小天下益知丘垤之卑然而道大則物必兼容名盛則衆斯咸慕雖問途豈資於老馬然致士方揖於怒蛙敢叙悃私重塵聽瑩伏念敦禮株愚智短芻俚才微素蘊壯圖啖牛

心而快賞居懷強學咀熊胆以助勤殫思慮於炙青萃
嘲評於尚白顧欲攄擣踴躍而涉其級頗覺沉浸醲郁
而作為文揚雄深戒於篆雕枚乘終流於骯髒規規摹
古欲捧腹以效顰忽忽求奇竟謹毛而失貌間闕干祿
黽勉應書裂繻上國之遊倚袂公車之後仲舒對策本
獨守於春秋德裕擢科欲不藏於文選雖自覺學行而
失步亦未忍轉衣而為裳抽餘韻於乙亥索微言於栗
密旁魄而論都邑人多笑其為狂矜夸而賦山河已亦

知其成癖訪遺跡於官館城池之異覃苦思於垣牆藩
溷之間成章不知所之深負小子斐然之媿不敏庶斯
達矣願聞先生莞爾之談雖磁石鐵以類相從實風馬
牛勢常不及豈意廣文之席適邇舍人之門塵尾餘論
妙理時聞鳩杖勝遊高風日至披冲襟而嚮道飾蕪累
以修容戰蟻詎足以勝雷髯虵豈容于登俎斯文不墜
寄子敢自異于名論天下中庸有公庶獲依於折衷恭
惟某官包羅百氏磅礴九流以輝煌汗漫之作而執耳

文盟以博大高明之資而盱衡士類一言嚆善四海傾
風自顧雖無玉珮瓊琚而放厥詞庶幾足免明月夜光而
投之暗鼎一嘗而未美雞數蹠而尚知覽進學解而譽
史才必得之畦逕之外誦鷦鷯賦而許王佐亦覘于辭
氣之間敢期戰場弔古遂識其精思正恐吳江落楓不
如其所見仰祈裁鑒曲借甄收

賀鎮江張尚書啓

抗旌臨郡揆日開藩風月萬家頓改江山之觀耕桑千

里已聞襦袴之謠將敬掣於齋鈴敢情馳於書牘恭惟
某官器涵端亮道蘊直方流華問以被民凜清規而照
國星辰曳履居文昌八座之崇銅竹分符擁東方千騎
之貴茲坐棠之未久知游刃之多餘上計獨優豈待五
月而報賜環催拜即陪半夜之談敦禮深愧材凡每勤
意予方懷章而言邁愧投轄之無從自違行旆之光愈
極搖旌之想室邇而人甚遠雖阻奉於色辭波及者君
之餘喜密承於芘潤

欽定四庫全書

宮教集卷九

宋 崔敦禮 撰

啟十九首

問候李殿院啟

漢殿追隨偶拔科級秦淮邂逅浸閱年華伏在賤微竦
聞登用亦嘗得餘論之末私竊高下風之行以為朝有
正臣自應享安樂得賢之福士無異論豈特為彘緣託
契之光伏惟執法居中自天叢社恭以某官受材英特

養氣渾全高明博大之學地負而海涵雄深辨麗之文
波屬而雲委植豐規而暉日絕高舉以培風蹕厲亨塗
汪翔華問深結宸知之異晉司臺察之明柱下昂藏衆
目為真御史班心突兀世有此古丈夫而自肅穆端朝
雍容造膝以紀綱不立為大耻以風俗未正為深憂剔
除巨蠹於盤根錯節之時排斥貴臣於盛意隆指之際
凜然風來之盛鬯厥精神之敷不特淮南憚汲黯而寢
謀抑使晉人畏晏嬰而聽命豈非忠純不二而學足以

守其道輔以機變無窮而辯足以申其言用能謀無不
從績乃可底敷禮夙聞高誼深嘆絕塵禮雖後於衆人
喜實先於流輩茲布尺題而展問竊傾下館以翹心趨
延英門而大言莫究歡愉之素弄大夫印而遂拜徒均
矚望之情火候鏐流臺綱嚴靖願益精於調衛庶茂對
於光亨

通漕使啟

巖邑警巡假聲猷之自舊頻宮誦說託封部以為光適

當受察之初敢後修容之敬恭惟某官清機昭理涵德
真淳材推游刃之神政妙斲輪之手給餉饋不絕糧道
方資流馬之功見言面略無幾微更奉單車之聘輯勞
能之甚卓積譽處以彌休行被褒嘉晉膺寵拜某塵埃
一命萍梗十年俾汰才省署之中乃得祿吳門之近方
息肩之云始屬抗節以言還徒以旅進之間莫罄久違
之悃邈仞墻而企踵未卜趨參憑尺素以函心曷窮稱
述

通陳運使啟

卑棲赤尉甘奔走於塵埃瞻望皇華行依承於條教幸
由天假恩有地歸恭惟某官德宇邃夷性天昭曠文章
政事為仕路之表儀儒雅風流揖古人之標致徊翔中
外更練事功頃分守於淮邦已藹聞於政譽得賢吏嚴
明之要知足破姦當公堂剖決之時言皆中的民隱灼
知於纖芥吏欺洞見於秋毫罔罔屢空里閭不擾至今
通民之相語咸言召父之復生銘德政於無窮愛甘棠

而勿翦星霜浸越位貌益隆屬戎事之方興止邊疆之
未靖六師賈勇將電掃以風馳萬口張頤非鬼輸而天
雨爰屈澄清之略往司飛輓之權天子有事匈奴軍儲
是急關中既得相國糧道何憂佇書盟府之勲即正台
衡之拜有心所冀不謀而同某淮海微生簪纓下列早
奉箕裘之訓濫叨科第之名重惟桑梓之興區曾是蕃
垣之舊服更時已久尚騰籍籍之歡聲拜履無從徒戴
家家之畫像不圖今日獲趨下風金就礪木從繩行克

承於約束鷄司晨犬吠盜當祇服於使令

通魏丞相啟

省曹掌故嘗叨進牘之私郡序司文更倚建牙之重託
洪鈞而惟舊企森戟以知歸恭掣齋鈴敬馳書牘恭惟
某官端朝首德柱國宗臣氣全渾厚而養之以純誠識
造高明而達之以剛大感會明昌之運發舒經濟之圖
排難厭紛亮節著艱難之際贊元經體真工藏輔相之
中關公道而多士興明大綱而百揆叙裴度稍從於綠

野謝安實繫於蒼生閔煩政路之崇借重吳門之近香
凝燕寢面千里之湖山吏退公衙賞萬家之風月雖上
畧優隆於敬老恐朝臣圖任而貪賢敦禮名第凡流淮
鄉下士一命簪紳之底三年蕪楚之中念作吏以困風
塵嘗橐書而上京國望翹材之館竊歎於無階伏光範
之門敢嫌於自贊重塵藻鑑深枉名論欲乘時漸致於
亨衢使隸職近居於華省得魚難兼熊掌方安需次之
渺茫失東復收桑榆所喜坐曹之清閒已驅車而于邁

適開府之云初望不素然幸寧有此魯侯戾止行與聽
竊聲之蘇周公歸兮恐難稽袞服之拜

通問梁舍人啟

攀緣科級嘗叨末契之光睽異色辭益歎絕塵之遠敢
修狂斐上叩崇明竊以同年之義在昔所敦末俗之澆
於今特甚隊趨行入曾不問其孰何君北我南了無知
其在否交情淡薄古道凋零倘拘分貌之間遂隔門牆
之望則將習久無復餘風因忘貴賤之殊輒叙興居之

敬恭惟某官風華靈茂天韻渾淪秉清德以照人植豐
規而輝國正辭簡古鄙衆作之小成與學博通卑羣言
之近用早奉大廷之策亟先多士之臚貫穿道原老先
生率皆斂手昭陳國體聖天子亦為改容道與時行寵
隨名至驚休名而旁暢踔華貫以立登太一前臨拂芸
香而夜直列星上應含鷄舌以朝趨茲峻陟於殿砌用
密親於帝仗義冠紱殿珥筆丹墀其在有唐或倚登於
相位至於近代亦平進於左班即被殊遷用攄素蘊敷

禮殊愚智短漫漶才疎學自守於僻迂文敢專於雕篆
抽楚謠漢風之餘思所願盡心恭南昌北部之賤官未
知免戾念昔慈恩之會獲偕騶御之僊年除月遷已分
雲泥之隔氣求聲應尚憐草木之同坎令方深朔風增
勁願益調於冲粹以茂對乎光亨

答費知府啟

光膺除書榮領祠館伏惟慶慰某官文高藝苑望重儒
林懷郡守之印章適所向之弗偶奉僊家之香火何自

取之太廉載惟么麼之資豈有揄揚之助過形謝牘益
重愧容感戢維深敷宣罔既

答常熟趙簿啟

籍甚多才之譽所願識賢粲然一紙之書胡為及我恭
惟某官珍凝廟璉秀毓天潢材磊落以不羣識䟽明而
無滯鸞鳳翔千仞之上豈枳棘之卑棲鯢鵬搏萬里之
遙佇風雲之橫奮敦禮久焉仰德幸矣為僚末路飄零
將露行之蒙潤高堂煥爛期燭影之分光

回吳江邵宰啟

秦淮風月尚懷揮麈之談吳會山川行聽落楓之句久
焉契闊幸矣逢迎恭惟某官襟韻疎明英華靈茂泳修
漢而擢秀挹明月以揚輝種河陽一縣之花此其暫耳
覽策府羣山之玉衆竊遲之敷禮隨牒官途濫巾師席
羣嘲漫解初無諸公衮衮之榮一笑相逢賴有故人戀
戀之意

回吳江呂宰啟

里巷游從共飲投金之水官曹聯接更依浮玉之堂帳
一別之時深披尺題而心喜恭惟某官夜光寶器喬木
名家材推游刃之神政妙斲輪之手魯恭有三異之政
行親見之公琰非百里之材豈久淹者數禮官途隨牒
師席濫巾媿無諸公衮衮之榮賴有故人戀戀之意種
河陽之桃李預期寒谷之春采泮水之藻芹坐釋廣文
之冷

答錢倅啟

光奉宸恩榮闕郡政別駕貳於刺史行觀條教之孚廣
文獨為冷官幸託仁賢之芘披尺題而增喜跂數伋以
馳誠恭惟某官質粹天球珍凝廟璉七貂世胄金張之
業有輝萬石家風齊魯之儒何及驚隆名而旁暢演芳
潤以宏敷佩王祥之刀已共期於國器題陳蕃之座姑
少屈於雋游即著康功徑躋要路敷禮詩書素履鉛槧
陋儒遲次省曹披沙見類濫巾師席附贅為慙召諸生
而誨之正切羣嘲之慮事大夫之賢者庶幾餘論之承

代召倅通梁倅啟

光奉明綸榮參陪闕當年綵侍交聞曳履之聲今日簪
朋並列題興之任遭逢希闊感幸并兼恭惟某官廟璫
器珍籙金學富泳修漢而擢秀抱明月以揚輝藹然譽
處之隆籍甚人文之美暫淹遠業來佐大藩別駕屏星
實凌厲雲霄之漸明光畫省看登庸衣鉢之傳某自愧
材凡忝聯世契雖未識老萊氏之子固稔聞萬石君之
名不自意於飄蓬將獲叨於倚玉趨朝並命顧疇昔之

難忘同官為寮獨於今之何幸

通陸倅啟

賓位偶虛猥應辟書之寵官曹相接遂叨寮采之榮跂
數仞以馳情修尺題而展敬恭惟某官簪纓望族詩禮
名家蘊奧學於簞金粹清姿於廟璉解呂虔之佩知器
遠之難量題仲舉之興信材高之未究佇觀環節之下
召置閨臺之間敦禮與世則踈向風甚久政恨承顏之
邈敢期聯事之親末路飄零幸借露行之潤高堂煥爛

願分鄰燭之光

回姚都大啟

比叨嚴召獲對便朝進西府之末僚還北門之舊直追
邯鄲之步已故迹之俱忘下楚些之招覺殘魂之漸返
恭惟某官至仁嘉善尚義隆謙枉慶問以先之流好辭
而寵甚永言登受之謹更重襲藏之榮感佩維深敷宣
罔既

答上元尉啟

書叙西來瓊瑤遠及披朶雲之字已觀作者之風宣綵
棒之威更託鄰封之芘伏惟某官風華靈茂學問邃純
抱明月以揚輝泳修漢而擢秀宜東觀石渠之選豈南
昌北部之淹州縣之職徒勞人亦聊爾耳神僊之人不
易得詎可量哉敷禮密借餘輝警巡下邑左右有所雖
云循故事於長安東西相望尚足詫英詞於文伯

回教官啟

青錢妙選竊欽屢中之才黌舍英游行遂披承之願觀

芝眉而非遠辱珍翰以為榮恭惟某官天韻渾淪風華
靈茂玉井之蓮十丈種學甚高丹山之鳳九苞摛文特
麗暫停雲霄之步寵臨芹藻之宮槐市風行聊振揚於
木鐸花塼影轉行入侍於金鑾敦禮久聞北斗之名未
快景星之覩簪朋盍契竊欣倚玉之光塵尾生風佇聽
懸河之論

回黃教授啟

逖仰風猷鋪聞道藝典教之官獨冷所願得朋明經之

望鼎來預慚奪席披尺題而增敬企數仞以翹思恭惟
某官天韻粹溫風華靈茂泳修漢而擢秀挹明月以揚
輝學士登瀛洲即奉夜談之對諸侯集泮水漫為晨入
之游敦禮芻材踈迂愚智短薄宦幾同於附贅橫經
何有於解頤會面無期每恨荊州之未識為寮何幸獲
同魯國之從游

通建康陳留守啟

充賦大廷嘗玷權衡之鑒效官下邑更依庥庇之餘幸

出自天恩歸有地恭惟某官一代首德四方宗師網羅
百氏而發為淵深簡古之文根本六經而富以總攬宏
博之學約而能肆贍而不華天下皆以吾道之寄命有
歸於明公明公獨為斯文之指南以盡其能事蚤出班
行之秀亟膺倚注之隆義勇冠於霜臺惟直道公言之
是徇含鷄香於粉省凜清規勁節之不渝藹然直聲著
在輿論僊錦帳握蘭之直從虎符分竹之榮畿輔承流
皆一時之重鎮湖山相望涕兩郡之歡聲至今擊柝之

相聞盡是甘棠之舊蔭奏課若此入拜則宜茲尚屈於
宏材煩總司於留鑰屬邊疆之未靖正戎事之方興必
慈惠足以撫柔吾民而威望足以震疊方面然後國倚
長城之固人歸愛日之溫仰寬顧憂惟得君重第恐夜
談思賈朝命旌黃不容歲月之稽即正鈞衡之拜有心
所冀不謀而同敦禮生則甚愚性惟嗜學方辭科舉之
累欲盡文章之功急祿為親求全於孝養低顏就列遂
困於吏塵將偷職事之餘益廣平生之學庶不忘於黃

卷期可致於青雲重惟骹骹之文辱在甄收之數蒙厚
知之已久趨下風而莫遑不圖幸會之來乃備使令之
末鷄司晨犬吠盜當祇服於教條金就礪木從繩行敬
遵於約束

代人通陳察院啟

簡自帝衷進居臺察正人登用有識嘆嗟竊以御史耳
目之官實曰朝廷紀綱之地明目張胆足以論庶事之
是非正色立朝足以別羣工之邪正自非有夷達寡求

之操而能秉質直不欺之誠則何以清肅官聯尊崇國
勢洪惟甚盛之旦大起至公之門副上所求於今尤重
恭惟某官清機昭理與學潛微道義自得於古人趣尚
不隨於流俗堂堂正論每拒諛而放淫挺挺豐規足廉
頑而立懦汪翔盛問更踐華津茲優結於隆知遂晉膺
於要用一臺克正四面屬觀必將開拓正途盡洗士風
之弊維持大法益清邦憲之源即被殊遷大輸素蘊某
欣聞成命倍激懦悰方祗服於官箴媿莫陪於賓履國


多君子未可議乃知吾道之嚴朝有直臣必太平敢先
有識之賀

迂運使黃察院啟

光奉綸音榮司漕計當踞虎蟠龍之地鼎會輸將妙木
牛流馬之思坐觀贍給聲光所暨原隰有輝恭惟某官
天韻深純風猷整拔氣剛而大凜清規亮節而不渝道
直以方抗崇論宏言而莫屈項奮鵬程之健峻登烏府
之班造膝沃心天下咸受其陰賜明目張胆朝端盡服

其精忠清議被民英猷輝世眷言江左寶號畿封方蟻聚以雲屯用嚴邊備豈鬼輸而天雨以濟吾師是用疇舉異能仰分憂顧有如鉅德實稱重權天子有事匈奴軍儲是急關中既得相國糧道何憂第虞金節之頒名置玉除之列入陪嚴近大究設施敷禮漫漶學疎株愚智短夙稟顓蒙之質徒多涉獵之功追時好以取世資偶叨科級去民田而就吏祿遂困塵埃聞澄按之來臨幸幘幪之有賴繡衣直指行先星鳳之瞻大廈既成獲

戴雲天之託



欽定四庫全書

集部
宮教集卷
十至
十二

詳校官庶吉士臣翁樹培

主事臣呂雲棟覆勘

謄錄監生臣孫 濬

謄錄貢生臣王兆泰

謄錄監生臣陳 垣

欽定四庫全書

宮教集卷十

宋 崔敦禮 撰

啟十二首

代賀王宣撫加樞密啟

誕揚顯冊登進元樞甲兵之問不至廟堂方託顧憂之
重柱石之臣宜居輔弼爰膺寵數之隆廉陛勢崇旌旗
色動恭惟某官興邦碩哲命世宗工負應變之材智酬
方而無滯屬匪躬之節勇見義而必為登步政途汪翔

民譽奇策懋昭於籌幄壯猷密布於機庭倚注方深勲庸滋茂眷言地重是天維要險之區勉為上行輟斗極凝嚴之望建油幢而立武開幕府以信威天子方委以腹心敵人可玩於股掌器博而用無近式恢經遠之圖勞大者爵必尊遂冠本兵之任寵隨名至道與時行方將傳檄而可定三秦豈但折衝而決勝千里煥乎懿績邁彼前聞某芘迹門墻受恩銘冶耳側絲綸之下心縻旌戟之間慶公論之咸乎激懦衷而增奮轅門蒲伏徒嗟

迹遠以無從沙路歡迎行見功成而入拜

代王憲賀王樞密啟

渙號明廷升賢右府文昌六曹之長積譽處以彌休北
斗七政之樞昇事權而滋重郵音傳播士論僉諧恭惟
某官負器疏通受材膚敏功名自喜深懲無用之空言
慷慨必為卓有可觀之大節踐敷雋軌登步亨途銓
筦清華盧李之賢莫及經帷邃穆堯舜之道是陳更任
使以浸多輯勞能而更偉上心所簡人望攸歸肆疇濟

實之材爰正本兵之柄精神遐暢敢輕秦國之無人勲
業增華共慶西平之有子某屬將外指側聽中除叩賓
閤以無階越輿情而倍喜

代李倉通留守賀洪樞密啟

顯膺鳳詔榮綰麟符使郡承流已奏治平之最陪京司
鑰就分委寄之隆綉纛有光簪紳相慶恭惟某官應期
良弼名世真儒亮節豐規驚英聲而旁暢高文大冊靡
衆作以分披徧歷清華之途遂登宥密之任稍退休於

真館旋起鎮於名藩以匹夫失所為深憂以比屋安居
為至樂仁聲周浹政譽汪洋尚淹帷幄之明謨來鎮江
淮之都會關中留相國固已增天塹之雄江左見夷吾
當盡復神州之舊某東昏有素檣散無堪屬誤領於使
華喜密依於鄉蔭驅馳周道尚睽台座之瞻邂逅都門
行見袞衣之入

代梁倅賀留守啟

誕敷顯冊出鎮陪京起安石於東山式慰具瞻之望分

召公於陝右用寬憂顧之深朝野聳聞搢紳交慶恭惟
某官四方魁傑一代宗工明古今治亂之原若指諸掌
上達文武弛張之要不出其環中早被遇於上皇荐結
知於英主彰纓麟閣政事多所講明我豸烏臺姦宄為
之斂避昨敵馬之南牧窺襄漢之上流凜然獨坐之尊
屹若長城之阻以身督戰運妙謨於帷幄之中為國宣
威殄強寇於笑譚之際功勲碩大事業彰明迨參秉於
國鈞益穆宣於天緯素所蘊蓄固將行道以濟時及其

經綸真是庇民而尊主雖讒波之遽起致玉鉉之微歎
從容不改於壯猷進止自安於常度方且養恬閑館玩
味真腴居綠野以優游結丹衷之懷想眷言江左實號
畿封擅虎龍蟠踞之雄萃箕翼張舒之盛若時謀帥尤
重得人爰膺倚注之隆全付保釐之寄關中既得相國
姑借重於帥藩袞衣以歸周公即躋榮於鼎席某簪纓
末緒擣櫟凡材抱黃卷以遊心曷探其域奮青雲而振
翮尚負初心叨居半刺之聯愧乏寸長之効不圖今日

得拜下風修屬吏之儀行獲依於芘潤託洪鈞之造尚有冀於提撕

代丘帥賀曾漕啟

祗膺眷擢榮領漕將行步蹇惟逖仰光華之盛專城剖竹幸叨臨按之餘聞命之頃馳心以喜恭惟某官珍凝廟璉學富籀金流華問以被民植豐規而輝國九卿惟月煌煌蒼玉之光五馬行春奕奕朱轡之貴硯新不頓斲久逾精尚資心畫之餘旋畀計臺之重佇觀成績徑

踐要途某一別時深尺題問阻匪自為於簡慢蓋有恃
於高明欣聞攬轡之臨獲在提封之內補苴罅漏自憐
五技之窮激濁揚清正倚二天之覆

又代丘守賀呂漕啟

被膺書贊榮總漕司錦帳含香久振望郎之譽綉衣將
指就揚膚使之華恭惟某官嶽峙環姿鼎涵淑氣表表
士林之標的堂堂相聞之規模暫淹材力之餘用領計
臺之重三十鍾而致衆一石聊寬負海之勞九萬里而

擊水三千未快垂天之使倚秦紅陳之課徑登紫橐之
班某濫職藩宣獲叨庇賴固所願也繫幸會之適然寔
能容之將悔尤之可追

又代賀胡漕啟

祇膺帝眷入按畿封素洽恩威不改憇棠之舊載行郡
國諒多騎竹之迎恭惟某官負器疏通受材膚敏周旋
三輔存敷濟劇之聲鎮撫十連更借偃蕃之重輯勞能
之甚卓積簡注以資深蕭何吾能用之早著飛輪之績

賈生不見久矣。亟膺圖舊之求。不但驅駕輦車而運九年之儲。固將簪筆持橐而備半夜之問。某藩宣亡補。曠敗為憂。技可笑於五窮。錦幾同於百衲。疇昔熟於條教。何日忘之。乃今奉以周旋。固所願也。

又代賀沈漕啟

寓直寶儲。觀風畿甸。星霜俄易。久睽芝宇。之瞻綉斧。鼎臨正託。雲天之覆。欣聞除目。實倍常情。恭惟某官風韻純淪。聲華整拔。抗崇論宏議。而莫屈凜清規勁節。而不

渝夙藹著於英猷久徊翔於榮路霜臺我身凜生白簡
之風星使乘輅嘗鞠綠扉之草旋膺召節趣覲嚴宸從
容陪右府之籌密勿坐郎官之帳謀謨深簡眷注益隆
偉江左之奧區實吳中之要會當踞虎蟠龍之地鼎會
輸將必木牛流馬之能乃臻膽給有如鉅德寶稱重權
天子有事匈奴軍儲是賴關中既得相國糧道何憂第
虞金節之班召置玉除之列某荷知有素嚮德尤深頃
季弟備數於幕蓮數辱品題之重而賤迹納交於棣萼

幾同莫逆之游不圖今日之逢獲就下風之列識韓荆
州之面固夙慰於平生仰蘇刺史之天幸密依於巨庇
又代賀呂漕啟

疏恩帝制易節畿封安習教條未改憇棠之舊載行郡
國諒多騎竹之迎聞命之初馳心以喜恭惟某官受材
膚敏負器疏通行芳潤以宏敷驚隆名而旁暢侯蕃偃
息存揚愷悌之風使指光華屢見澄清之志劘新不頓
斲老逾精雖易地以皆然喜去天之不遠固將簪筆持

橐以備半夜之問豈但輦車驪駕而運九年之儲某綿
薄何能蕃宣亡補企旌麾而有仰託封部以為榮激濁
揚清正倚二天之覆補苴罅漏空憐五技之窮

又賀沈漕啟

恭審光被綸言晉司漕計起寇公於河內共僖於登庸
留蕭相於關中漫勞於累績恭惟某官清機昭理興學
潛傲鼎鼎彌高發盛名於一世恢恢多裕絕敏悟於千
人徊翔郎闡卿寺之清班敷歷使節守符之要選矧新

不頓斲老逾精輦車驪駕而給轉輸方觀成筭簪筆荷
索而列侍從即展宏圖敦禮鉉繫陋儒詩書素業省曹
遲次偶類披沙師席濫巾更慚附贅竊欣巨庇之有託
私卜羣嘲之可逃慶抃之私數宣罔既

又賀沈漕啟

伏審拜命漢廷觀風吳會春闈程試嘗叨衡鑑之明星
節鼎來正託雲天之庇遭逢若此閭閻惟深恭惟某官
朝璉凝珍天球比粹海涵地負浩乎道德之內充月潤

日光倬彼聲華之外發舒翹巍級振羽亨衢凜白簡以
趨朝姦邪斂迹耀綉衣而持斧草木知威從容陪右府
之籌密勿坐郎官之帳汪翔滋久簡注彌深眷長江方
面之衝正列郡輸將之會六師嚴壁方蟻聚以雲屯萬
口張頤豈鬼輸而天雨是用峻寶儲之直肅分使節之
光第恐不待席溫即膺環召給關中之餉饋未究設施
陪天上之班行倚登嚴近敦禮迂踈陋學猥瑣微材追
時好以取世資偶叨科級去民畝而就吏祿遂困塵埃

自惟疏逖之蹤嘗被品題之重與韓弟子之列已夙慰
於平生依蘇刺史之天幸今承於巨庇

又賀浙漕陳宗丞啟

恭審持節觀風彩纓入覲久不見賈想聞天上之咨嗟
吾能用蕭坐使關中之膽給某官行全忠恕性迪誠明
文遠乎經笑諸生之塵腐學醇乎道閱理趣之精微斂
所養足以涵道真發其才見于應時用頃者淮壖之政
畧施材力之餘宇定而天自全鑑明則塵不止故能疏

觀利病靜閱賢愚吏欺洞見於秋毫民隱詳知於纖細
三月報齊侯之政已聞課最之優二星驚蜀吏之占果
叶使華之遺歷考此邦之近事間被清朝之異恩猶須
遲之歲月之間詳試以觀其效然後錄其循良之績拔
用以旌其功未有坐席始溫賜環俄至朝握符而飛皂
蓋暮攬轡以紆綉衣寵光之隆敏捷如此若時浙水視
昔畿封天日所臨人材易見遷之近庶其可以行觀而
言察任所難抑亦待其望重而資深佇籌心計之精即

在禁巖之地某頃叨未掾嘗被厚知賀履誠深竊自同
燕雀之喜登仙路遠恨不為騶僕之隨

欽定四庫全書

宮教集卷十一

宋 崔敦禮 撰

啟十三首

代馬守到任通張漕啟

寢燕凝香自昔享名藩之樂室如懸磬厥今同凋郡之風師
之見糧吏無繼廩財既窮於竭澤費何補於漏卮適茲困弊
之承喜有忻懽之託恭惟某官賦材精敏負器疏通鳴玉登
朝早著月卿之望褰帷行部更揚星使之威積譽處以彌休

輯勞能之甚卓佇頒金節召置玉除某受察云初辱知有素
補罅苴漏敢辭五技之窮涵垢匿瑕正倚二天之覆

代人賀留守張舍人啟

承聞大號顯拜殊恩鳳閣躋榮備極寵優之異鹿坡贊
畫更當方面之衝朝野聳聞搢紳交慶恭惟某官元精
上瑞間氣全材九萬搏程自整頓垂天之翼八千鼓篋
獨鏗鏘擲地之聲徧踐清華游揚中外乃眷艱難之際
尤深注倚之專天設金湯任莫隆於居守雲屯貔虎謀

允賴於折衝名位至崇兵民攸繫爰以西垣之直出分
北顧之憂華夏望風江山增氣蕭何吾能用矣方藹著
於威聲馬周暫不見之諒已深於懷想佇前大拜益究
遠圖某困頓无堪迂愚已甚茲濫居於曹掾愧殊乏於
材稱欣聞成命之傳實倍常情之喜趨庭敘板行參前
列之龜染翰舒牋徒若賀成之燕

代建康倅賀張舍人啟

光奉贊書顯膺異數寵優事特峻登綸綍之司任大責

專兼付兵民之寄除音一出輿頌四馳恭惟某官負世
軼材受天間氣文皆貫道鄙衆作之小成學本輔時卑
羣言之近用以一日而魁多士不數歲而登要津功業
著隆搢紳欽歎眷籌幄贊謀之任尤重得人而陪京留
鑰之司實難謀帥乃如首德素簡上心亟躋禁掖之班
全付事權之峻佐裴度而平淮蔡姑暫屈於蕃宣思馬
周之識事端諒已深於注想即膺召節入踐政途某媿
乏長材濫居半刺雖吏責之甫及實曠敗之是憂自惟

牢落之蹤嘗遂參承之幸不圖今日獲超下風鳳凰之
鳴高岡詎敢萌於攀附燕雀之賀大厦深有賴於併蒙

賀建康留守張舍人啟

光膺書贊榮被宸恩眷寵用隆入侍禁嚴之邃事權增
峻出分筦鑰之雄除目布傳羣情闔懌恭惟某官一代
魁傑四方宗師羅網百氏故其學浩博而閎深根本六
經則其文淵源而簡蔚清規輝世與學丕天衍芳潤以
誕敷驚隆名而旁暢大廷發策冠臚傳於唾手之間真

主結知馳駿坂若走丸之易駁歷方丈蓬萊之清選周
旋鸞臺鳳閣之上游頃分守於輔藩已謁聞於嘉績居
之以明敏而有撥煩濟劇之術持之以簡素而成減騶
徹樂之風吏欺洞見於秋毫民隱灼知於纖細旋聞報
政之最亟被賜環而歸眷江左之輿區有陪京之巨鎮
雲屯貔虎今號要衝天設金湯古稱地險方平時無事
之際所任猶難况今日多艱之期其責甚重有如鉅德
素穆師言寬上顧憂非公孰可是用峻躋法從全付重

權命畢公以保釐姑嶠輟秉鈞之任憶馬周之敏識諒
已深側席之思佇膺召節之班即止台衡之拜敦禮迂
違陋學猥瑣微材追時好以取世資偶叨科級去民畝
而就吏祿方困塵埃不圖幸會之臨將遂趨承之便聲
名四海久願為之執鞭部屬一官茲第勤於賀厦

代丘守和嚴到任啟

萍梗飄流方歎越吟之在楚耕桑交跡竊欣魯柝之聞
邾雖拔薤之無從喜伐柯之不遠恭惟某官珠璣咳唾

錦繡肝腸文章自以詩鳴問學不為俗絆春風道院想
鈴閣之多餘夜月澄江宜錦囊之益富豈久紆於銅竹
行趣對於金蓮某別日未多向風已劇遙企坐棠之盛
惟勤與梓之恭三年違粉社之期因深懷土九里接洪
河之潤幸借餘波

代賀詹司諫啟

輟自郎省擢登諫垣受知方深有識相慶咸謂朝家以
碩大無朋之福迺畀言責於端靖不撓之臣仁義之學

足以推廣上心正大之辭足以翼扶公道績乃可底國
由是尊恭惟某官粹比天球珍凝廟璉以清規亮節羽
儀多士以懿文與學根柢六經登步華途汪翔休問郎
官上應列宿方陪錦帳之游天子諍有七人更倚皂囊
之獻佇聞籌合即副巖瞻某久仰餘光欣聞成命佩魚
符於甸服莫先賀列之趨酌獸尊於天階遐想朝儀之
盛

代丘守隣郡賀冬啟

聽解律之宮聲一陽來復望魯臺之雲物萬福攸同恭
惟某官宜弟宜民中和布政昔襦令袴惠均洽於陽春
佩犢帶牛人自安於化日當景長之履叙宜川至以蒙
休某屬領州符阻趨賓閣分光隣璧竊依趙日之暄託
訊郵函敢致周正之賀

代前人賀虞丞相加食邑啟

鉅典慶成異恩鼎至以功受賞有加命秩之崇與國同
休更啟山川之錫凡居聞聽孰不欣愉竊以天子必有

尊方懋隆於孝治朝廷莫如爵蓋允答於元勲亶惟命
世之英式贊非常之慶忠嘉深簡光寵用休恭惟某官
博大而高明洪深而果毅孟子之道性善必本乎仁義
之歸皐陶之為帝謨允迪於聖智之事欽惟舜德克繼
堯勲雖巍巍其有成功撝謙不伐常業業日致其孝歸
美惟勤益增顯號之榮永奉慈顏之喜廣愛形四海既
昭譽於徽章上賢為三公實相成於盛事爰錫屏藩之
寵用旌弼亮之勞福祿無窮勲庸甚茂某側聞乎號喜

極儒衷誦使臣言遠之詩徒傾意氣望相君翹材之館
想見光華

代王憲答趙明州啟

叨膺寵數濫總祥刑濡轡在行莫奉數行之牘啟函下
拜遽傳兩喜之言佩謙柄之勤隆搖心旌而傾遡恭惟
某官珍凝廟璉秀毓天潢流華問以被民植豐規而輝
國朱轡布政課屢奏於甘泉濫節宣威箭無傳於青海
勲勞滋茂寵眷彌優姑倚重於維藩即躋榮於夾輔某

材資篤緩性稟枵疎茲存領於使華媿莫承於隆指下
大夫之位刺史敢云風采之新長諸侯之居東方庶託
悵懷之大

代人謝婺州到任啟

將輸遠服已媿罔功假守近藩又叨申命肅涓時日祇
見吏民首宣九重側席憂勤之懷次道一相同心輔贊
之實咸識此意舉忘其災伏念某識不逮中器非致遠
詩書事業初無游刃之長州縣塵勞自覺斲輪之老向

玷朝行之選浸登宰掾之班一去脩門三更華節當軍
務飛書之日及饑民待哺之時俱竭忠勤遂覺曠責精
神消耗齒髮凋衰已絕念於功名行收心於香火眷言
近甸厥有名州古號劇繁建漢都尉之治今隣浩穰命
周保釐之賢適更荒歉之餘已有流亡之衆田閭嘆息
倉廩窮空雖冒昧以茲來殆徊徨而是慮信不素孚而
欲使豪強相勸而傾廩恩非夙著而欲使貧弱有恃而
安居方當視印之初益有臨淵之畏究殫篤鈍憑賴寬

仁茲蓋伏遇某官宏業熙邦大猷經世凡匹夫之失所
愧常軫於納溝俾多士之適宜要獨先於執度豈圖委
使猥及懦庸某敢不巨細必親夙宵匪解蕤蒔之豐有
望儻蘇難食之民犬馬之力已疲終冀均休之請因脩
謝禮併露懇悰

答總管啟

總漢籍之伍符方徯踵門之幸拜荊州之十部遽先移
牘之臨恭惟某官材力驍雄性資沉鷙傳祕編於圯上

稟秀色於山西金甲牙旗未究安邊之略碧油紅旆聊
為清部之行敦禮每切嚮風未諧識面傾蓋如故將期
幸會之逢投壺雅歌當奉從容之樂

代方守答趙明州賀奉祠啟

宗藩在望方欣魯析之聞邾真館投閒自笑越吟之病
楚捧尺題而增媿邈森戟以知歸恭惟某官璿萼儲英
珠源毓粹壯矣維城之託屹然磐石之安絳節宣威箭
無傳於海嶠朱轡布政課屢奏於泉宮簡注彌優勲勞

甚盛昨五色之土聊分青社之封誦九罍之詩即見袞
衣之入某漂零末路衰瘁餘生卧病淮陽心慚非據養
疴瘴浦分合退安辭上徹於天閭恩許休於田里伏枕
對畫蛇之俎方納履以言歸啟函披素鯉之書徒攝衣
而下拜

代賀蘇給事啟

輟自諫垣晉登禁瑣夕批敕尾論愈切於囊封朝奏殿
中地益親於伏閭眷任之意方篤正大之言可行郵音

傳聞輿頌交作恭惟某官稟天剛粹負地直方挺挺豐
規足廉頑而立懦堂堂正議每距詖而放淫風烈不墜
於家聲智畧深承於睿眷將罄謀猷之告更躋論駁之
司元素多仁人之言願聞爾矣叔翰負宰相之器衆竊
遲之某久託餘光欣聞成命屬謹官箴之守莫陪賀笏
之趨朝有直臣必太平敢先士論之慶國多君子未可
議益知主勢之尊

欽定四庫全書

宮教集卷十二

宋 崔敦禮 撰

雜著十八首

代平江守題御劄獎諭碑

乾道九年秋七月平江闕守詔以臣知軍府事九月軍
須了辦蒙恩賜御劄獎諭平江會府經費廣賦入不繼
匱乏之聲徹於天聽臣既受命出守視事之三日按倉
廩察府庫郡之所須枵然無遺始乃惶汗失措以不克

稱塞為懼又念職分守土繭絲豐耗已則是責不敢喋
喋以瀆君父於是策駑鈍夙夜究極以振空竭殿司
就牧之資水軍列屯之餽月費鉅萬僅逃乏軍之誅宸
恩優異遽賜褒勅奎畫雲章震耀心目登拜跼誦以榮
以倖竊惟聖天子在上規恢遠圖顯著綱紀昭融勤懈
吏道畢振一時人材奮勵慙忠以趨功名之會臣之綿
薄有此冒寵自揆懼曷敢以私所賜敬用饒之琬琰
垂耀方來非特蟣蝨小臣得以承無窮之光亦將傳玩

四方以為有位者之勸云十月日具位臣拜手稽首謹書

龔養正芥隱銘

子龔子家于吳門有室甚隘促膝不容舉頭則礙託而隱焉名之曰芥蹙蹙乎較蟻穴之居蚊睫之館僅為之配人有過而問曰體以養移氣由居改孟子所以誇數仞之崇高少陵所以羨萬間之覆蓋今子獨不然抑又何故龔子於是撫掌而笑掉頭而言曰吾不然吾不然

吾豈與子論小大之間哉子其索我於形骸之外吾自
視斯室空洞踈闊足以納太虛而包法界其於川瀆流
注山嶽凝結反而求之無乎不在吾方陶然而居休然
而泰羅萬象於几案之間揖八荒於軒戶之內者也崔
子聞之曰芥哉芥哉龔子其得所隱哉安而止俾勿壞

廣運潭銘

唐天寶紀元之九年陝郡太守韋堅有請治漢隋運渠
起關門抵長安以運山東之賦有詔從之乃絕灞澇並

渭而東至永豐倉復與渭合又鑿潭於望春樓下以聚
舟越二年潭成天子臨幸嘉焉錫名廣運竊惟唐都長
安左崤右蜀沃野千里所出雖多所用滋廣故常轉漕
東南之粟以足關中然歷三門底柱之險多風波覆溺
之虞楊務廉議鑿棧之役而人被其害李齊物建開山
之請而舟卒不通裴耀卿議置諸倉而北運亦艱厥費
尤甚至是乃用堅請既復舊渠以興遺迹又鑿巨潭以
聚衆艘連檣挾櫓舳艫並進珍奇寶貨錯雜布列吹笛

鳴鼓輻輳樓下都人士女聳觀可謂偉已當是時如崔
成甫徒知制得寶之曲而未能勒銘章以示不朽回視
鄭陂之頌新豐之碑得無愧與敢因闕文而為之銘曰
唐受天命長安是都國用不給東南是輸開元太平費
日滋益惟是漕渠議者固識有臣曰堅是究是圖爰得
遺跡起漢訖隋迺浚治之以便糧道役無淹辰渠以成
告南絕灞澹並渭而東循環周流會于永豐層樓屹然
下瞰天府鑿潭其旁漕舟所聚是經是營大輸東南萬

艘並下舳舻相銜篙工柁師芒屨短袖連檣挾櫓鱗次
輻輳有尉成甫製歌以揚和者百人鮮服靚粧鳴鼓吹
笛來湊樓下都人駕肩歡舞嘆訝天子望見喜形于顏
爰賜嘉名曰廣運潭時惟耀卿是興北運歷時浸久人
以為病粵有齊物鑿山為門舟不能入水益怒奔猗歟
此潭克紹前古我作銘詩勒之岸澣

硯銘

異哉崔子之硯也鏤獸以為模環山以為池獸有炳蔚

可見之文山有清明秀異之姿斯二者皆象夫君子所為異時藻潤邦光粉飾王席則出而用不然且押而藏之所謂天在山以蓄德含其章而發之以時者也

鼎銘

韓子所載劉師服侯喜彌明聯石鼎詩讀之數遍鼎之形模可以盡得依倣模畫為龍頭豕腹瓜蒂芋萌狀頗謂得真以白金令善工就之著銘其上銘曰制雖古意則新玩其器懷其人

御風列子贊

馳駿馬而上峻坂馬弊則窮駕輕車而適四方車折則止何者彼其所以行假于物也至哉列子御風而行飄然冠裳與風適迎是亦未免于有待也使風定籟息則吾不知所以乘吾聞至人神動天行彼其扶大虛御正氣游乎八荒之外則行乎止乎吾安知所以然哉

張魏公像贊

堂堂魏公千古之英名震天下如雷如霆世之以成敗

論人物者咸曰公開揔戎之府提百萬之兵左圖右畫規模則宏而迄無成謂公之實不稱厥聲抑不知忠許國而有為躬任重而不驚凜凜乎清中原吞強敵之氣歷九死而不變其孰知公之忠精嗚呼公乎人安知公之然哉蓋公之所能者人也於時則有所不能此余所以覽遺像而撫膺乾道二年重午後一日

倉耗解

崔子朝出遊市寂然若將暮賈匱農困閉而不張錢井

金溝謹其闔藏收列肆於九衢刀布滯乎千商至於白藏之府紅腐之倉實懷積滯琛幣充梁亦且籤籌寢乎會計關石罷乎低昂怪而問焉有客言於余曰是為春孟望之後一日其名為倉耗財賦出納必有耗竭人所共畏焉崔子曰信然歟客曰是日也著之令甲以為可戒子何疑之有且時之在天有凶而有吉人之於事有避而有就反支為封章之忌甲窮為用武之凶循火焚於陽和之後戒作室於惡月之中夏則戢土工之役春

則禁斬伐之施毋留獄於秋月止發蓋於冬時人之所
畏安得不畏之况夫倉耗之名有自來矣余非陰陽家
流蓋嘗攷之傳記春孟之月日月會于娵訾其宿為危
室壁奎之分其象為天倉儲粟之所今茲既望則月之
滿者向乎虧月之盈者向乎虛司出納者忌夫虛且虧
也故於是戒之崔子曰是可畏也矣雖然子所謂耗者
將天奪而鬼縮之與抑水毀而火鑠之與抑雷霆擊而
取風雲卷而去與胡為乎謹關鑰固扃鐫兢兢乎獨於

是日也夫所謂耗無日無之人之由此常不自知曷於是日而獨畏為請為子言夫耗之本男不耕耘游手而嬉婦不布帛組麗是為荒南畝而弗勤撫機軸而居奇豐年有啼饑之嘆大寒興索裘之悲則未作之民耗之矣侈奢隆富猗陶埒名公盜山海貨殖私庭鏹藏鉅萬利不周施田連阡陌貧不置錐則兼并之民耗之矣庶人之室侈擬公侯琳宮梵宇帝居同伴倡優僭乎后飾土木被乎文繡錯金翠與珠玉絡綺錦而編綬則習俗

之侈耗之矣疲羸之夫懦瘵之民被甲荷戈偃蹙不勝
混迹剽猛羣驅連行待哺張頤竭廩空困則無用之兵
耗之矣事不省官羊牧交并官不擇人牛驥同鳴駢倚
疊足排廁鱗征無事而食塞局填局饕竊餽廩自為身
榮則不急之官耗之矣視民之利欲漁而獲視公之財
欲欺而得謂自營為有功以阜國為無益謂厚己為得
計以利民為失策起重斂於無名竄簿書於昏惑恣漁
蠹與鼠竊涸利源以竭澤肆姦賂於苞苴空帑藏以貿

易則貪鄙之利耗之矣吁山林之盛不足供無窮之焚
江河之廣何以實有漏之卮一線之溜有穿石之患單
極之綆有斷榦之期苟六耗之不去將吾財之弗遺夫
世之所以為耗者若是而客乃因日月之交會察弦望
之盈虧吝出納於是日嚴警戒而畏之是所謂蔽於天
而不知人不揣其本而惟末之齊者也

平江勸農文

國家務農重穀屢下明詔戒勅四方毋傷民事及春和

時又遣刺史親行阡陌勸種藝于農民爾農民其聽刺史言古之時民年二十即受田一夫而百畝春將出耕於野里胥平旦坐於右塾鄰長坐於左塾民畢出然後歸是以地無曠土邑無敖民衣食足倉廩實而民無飢寒流離之患吳門土沃而泉甘賦入之上于大司農者素甲於江淞歲大熟揚珠擣玉充牣盈溢年來習尚侈靡末作者勝雕文刻鏤以相誇耀歲一不登民有飢色扶携轉徙纍纍然於道路非從事焉者寡食其力者不

至耶刺史甚媿焉今既節其調度時其力役皂衣白梃
之隸不得擾於田野爾農民其各安業深爾耕易爾耨
疾爾穫毋或失時及秋百室既盈婦子既寧刺史將勞
農休息饗朋尊烹羔羊與爾共樂豈不休哉

謗規

人知謗之可憂我以為喜之尤人知謗之可畏我以為
愛之至昔者子路樂聞有過道入堂奧德盛名播鄭有
鄉校謗議沸騰僑也不毀其政以成誹木諫鼓聖則設

之道路之謗聖則納之而今之人云胡不思聞譽而悅
聞謗而怒過則不知為禍之助淤泥生蓮糞壤成芝扁
扁巧言得道之資謗者為忠譽者為諛謗之為誠譽之
為欺我欲聞謗而未得之敢作斯言以為謗規

題韓子蒼帖

東坡每得士則喜語人曰所向無一遂獨於文人勝士
多獲所欲宜造物者專以此物見厚耶余謂陵陽之得
黃君其庶幾矣

跋蔡確帖

忠懷公墨帖及送將歸賦其死生禍福之說讀之使人
嘆息公初貶新州晁美叔謂人曰以言語罪人今日長
此風他日雖悔無及嗚呼美叔深智遠慮所存者大矣
使信其說則後來之禍豈遂至於不可救哉

留窮文

子雲之逐貧退之之送窮辭各偉麗余反之作留窮屢
空先生正月晦日揖窮鬼與之坐而告之曰子高陽之

裔顯帝之支衣必縷裂食必用糜生號窮鬼沒為窮神
死以是日人謂送貧吾與子遊於茲有時矣其相得如
膠漆之固其相與如魚水之情故不敢追逐流俗結柳
車縛草船載糗與糗繫牛引帆以送子行子能舍我而
他之乎言未既歛然若有笑于列者曰先生欺子哉夫
安貧樂道雖士之常貧而無怨亦人之難人有蘭宮秘
宇雲楣虹梁玳瑁布翼棟桴高驪蒂倒茄於藻井飾華
棖與璧璫此宮室之麗人所共安也而先生以余之故

獨得夫甕牖而蓬窻六珍珠品四膳異肴窮海之錯極
陸之毛尹公爨鼎庖子揮刀列方丈以華錯陳員案而
星羅此膏粱之味人所同願也而先生以余之故獨得
夫藜藿而簞瓢翡翠火齊流耀含英懸黎垂棘夜光在
焉硤碱綵緻琳珉青瑩珊瑚玉樹周阿而生此衆寶之
奇人所娛心而侈目也而先生以余之故常捆載垂橐
曾不得一金之為資固宜絕我棄我屏之遠方門神戶
靈叱為不祥遂故就新招迎富康而方且眷眷留我而

不忘敢問所以受知於先生者何如也先生曰吁子來
前子之儔朋非三非四在十除五滿七除二順厥天常
立為名字凡所以日訓誨於前使吾佩聖人之道而不
為流俗之歸者皆子之志也且夫刻剝侵削肥已瘠人
漁民之財以資厥身此可以富矣子則曰奈何傷吾之
仁其名曰仁窮祿可苟求位可力致見德不思惟利是
嗜此可以富矣子則曰奈何傷吾之義其名曰義窮覲
覲貪饕進進不止矯矯亢亢固顧廉耻此可以富矣子

則曰奈何傷吾之禮其名曰禮窮籠以術數周以心計
揣摩低昂而罔市利此可以富矣子則曰奈何傷吾之
智其名曰智窮為姦為欺為鄙為吝乖誕弗恤貨殖是
徇此可以富矣子則曰奈何傷吾之信也其名曰信窮
凡此五窮為吾五友厄窮相隨貧賤相守教之誨之使
我不苟吾其在下得此五友磨礱訓勵以飭厥躬吾其
在上得此五友傑卓清特以奮厥功使千百世之下凜
凜乎仰吾之清風所謂富貴不能移其志勢利不能動

其喪者也若夫慕外物之謂樂謂貧賤為可悲斥吾五友而去之茲余之所不忍為已而五窮相顧失笑曰先生知我矣願與為友無相棄

代祭陳運使文

惟公德粹而夷行和而恭魁然重厚長者之風問學之源則有所從了翁之門默堂之宗早躋朝行厥問顯融璧水是師金閨是通命登宰察紀綱彌縫命掌掖垣卓然詞雄僉曰宜哉金鼇之宮公謂不然予惟外庸其車

皇皇于江之東尚期還歸克暢厥功云何天奪夜舟俄
空念茲同寅周旋從容十日不見奄然長終顧視陳迹
揮涕沾胃歌此奠詩以告我衷

祭陳運使文

惟公奧學本於家傳鉅材見於時用外臺將指方持金
節之華遊水興嗟遽赴玉樓之召咽悲筵於曉日拂歸
旄於秋風酌以清樽敬致靈輶之奠潸然哀涕為同行
路之傷

代祭林樞密文

惟公醇明碩大端介直方於仁則柔於義則剛其柔維
何政安且平分麾乘輅父母其稱其剛維何不畏彊禦
洪樞宥府委焉如履公之退休凜乎高風優游樂康八
十而終念嘗相從閩海之涯綢繆話言有偉其辭云何
一別遂隔生死寓哀往奠嗚呼亡矣

祭梁憲恭人文

端良之德令淑之姿克昌高門婦道有輝富貴康艾百

年其期奄斯淪沒聞者嗟咨清酤薄奠冤其歆之

福建提舉錢公侯墓誌

淳熙五年夏五月朝請郎提舉福建常平茶事錢公以疾卒于家越明年冬公弟秘閣脩撰福建路轉運副使佃以書來曰先兄葵有日矣嫂氏圖所以託不朽者聚族黨而謀之咸以子宜諸孤不敢違杖而走敢請某捧書泣曰某幸託公門辱平昔之愛厚今當銘公墓雖哀甚文不能緒亦何敢不力顧念銘所以信後世者以其

公爾今取諸姻親之私得無以某故反鬱公德美亡以
畀後人以告脩撰脩撰反命曰事問可傳不可傳言問
可信不可信何疑親為且前輩鉅公為此可考也某矍
然不敢當益謝不獲則序而銘之公諱侯字廷碩一字
惟大其先吳越王䟽屬有賜田居常熟之李墓者故世
為平江常熟人曾祖仁貴不仕祖衍累贈右朝議大夫
父觀復嘗為尚書戶部員外郎累贈通奉大夫公自少
穎異讀書不求涉獵務極源底戶部公既及金盛時從

諸老游窺其堂奧於易學猶深公既盡聞餘論又擔簦負篋追四方名儒講道理問經義嘗受春秋於師古先生遂盡通其旨蓋公之學非利祿計者也甫弱冠從鄉進士舉考官徐良能見其文不凡有本源意必老儒曾多識前輩遂以為選首啟封乃公大驚異之公自是聲發騷騷游上庠率占前等厥稱譁然紹興二十一年中乙科授迪功郎調紹興府山陰尉未赴丁戶部憂未終喪丁太夫人憂公率其昆弟執哀幾毀免喪暮年始求

仕授泰州州學教授自一命閱十餘年而僅得祿同時
流輩悉清顯矣公貌夷氣粹益和且平泰兵後庠序不
治然士子聞公名樂公之來相與接踵來歸充溢于門
公發明經義貶異植正學者往往優游厭飫得通其意
會時議省兩淮冗員教官在省中士子羣詣請留守上
其事獲請泰講席賴公獨不廢乾道二年任滿以薦格
轉從政郎召除太學正公從容學省斂以靜晦人莫窺
其涯際五年考滿以訓導有勞改宣教郎六年除宗正

寺主簿以書賞轉奉議郎七年遷太府寺丞未幾兼倉部郎中始人皆以公儒者不嫻於吏及司出納掌儲峙簡明精密成就條理方知公為有用之才也是年轉承議郎八年遷宗正寺丞以丐外得請知袁州九年轉朝奉郎未赴郡淳熙二年以秘書丞起于家公有庠序名又徊翔中都衆望久屬館閣任人物者屢以言欲上輒止至是士論謂宜既而兼權司封郎官適慶壽肆賚曹事紛委公酬答裕如事以畢舉引同列嫌罷權除秘書

省著作郎轉朝散郎四年除將作少監轉朝議郎五年
以疾請除提舉福建路常平茶事方待對而卒公清方
篤誠明白純粹居無一語妄亦不能曲密處已接物氣
仁色溫至論古今辨是非議論奮發扶正疾邪有凜然
不可犯之色與人交遇所合輒傾倒見肺肝至非其與
一璧絕外之其學師友淵源於經術必究其微言大法
其文簡深安重專慕柳子厚之風平生無他嗜好於世
事雖服食亦不問自旦至暮悉沉冥於文史藏書數千

卷朱墨精謹皆手自校夜漏盡三十刻猶青燈熒然聞
誦書聲已而援琴撫曲家人知其將寢雖至老亦然居
家撫昆弟怡怡侃侃無一毫間言仕中都不事趨競當
路僅脩常禮未嘗前交一談達官以故嘗一詣之客衆
不得道款密終其去不再往是以回旋委蛇卒不大振
然而其自視仰無愧俯無怍孔子所謂言忠信行篤敬
雖蠻貊之邦可行者至其終無一語及家事談笑不亂
安坐而逝自非踐履實地合於誠明之學詎能然歟平

生所著葺其遺藁得文集五卷諸經講解十卷易說三卷藏于家公娶同郡馬氏封安人三子曰懷忠曰言忠曰作忠其伯仲嘗以國學薦試南宮皆力學能文有志持門戶者二女長適某次適迪功郎臨安縣尉陳紳始公懷宜春太守章還家上冢指其東麓曰他日必葬我于此毋令遠吾親也諸孤從其志以淳熙六年十二月七日歸公縣虞山戶部瑩之側其銘曰賦之厚矣而曷艱其施仕之亨矣而曷戾其宜學不陪細旃之論文不

登清廟之詩與隨而夷寧介而踦衆趨我違迄止于斯
嗚呼刻銘幽宮予以昭之

